

陳州府志目錄

卷首

序

凡例

目錄

圖經

卷之一

沿革

有表

卷之二

星野

有圖

卷之三

疆域

卷之四

山川 附河渠津梁

卷之五

建置 城池 廨署 倉廩 坊巷 集鎮 通舖
郵政

卷之六

學校 附名宦諸祠

卷之七

聖蹟 附書院義學

卷之八

聖蹟

卷之九

祀典

卷之十

古蹟

附陵墓寺廟

卷之十一

風俗

附物產

卷之十二

賦役

卷之十三

職官

卷之十四

名宦

卷之十五

武備

卷之十六

選舉

卷之十七

人物
上

卷之十八

人物
下

卷之十九

忠義孝弟

卷之二十

流寓

隱逸

方伎

卷之二十一

列女

卷之二十二

列女

下

卷之二十三

仙釋

卷之二十四

藝文

一

詔勅

表奏

告文

虞書

序引

卷之二十五

藝文

二

記

卷之二十六

藝文

三

記

卷之二十七

藝文

四

贊頌銘

傳

碑銘

論辨

墓誌

疏引

賦

題跋

卷之二十八

藝文

五

詩

卷之二十九

藝文六 詩

卷之三十

雜志

祥異

兵變

外傳

幽異

陳州府志卷之七

楚鄂崔應階吉升氏纂修

聖蹟

昔夫子周游天下齊楚宋衛間皆有車轍馬跡獨於
陳主司城貞子居三歲乃反夫愛其人者必及其山
川草木如南國之甘棠淇泉之棗竹至今載在風雅
矧七日絃歌陳人被化萬世而下不惟仰宮墻者瞻
拜肅然而誦讀詩書於其際者儼若杏壇洙泗親炙
聖人之光舊僅附載古蹟過矣志聖蹟

絃歌臺孔子在陳絃歌之地後人築臺以祀在城西南

隅與義陵南北對峙四面環水高臺翼然洋洋乎陳國之巨觀也臺上建大成殿一聖十賢各肖生像音容如在絃誦如聞登斯臺者疇敢不敬

史記周敬王二十四年魯定公之十四年陳潛公越之六年也孔子年五十有六先是以魯司寇攝行相事魯大治齊人沮以女樂季桓子受之郊不致膳孔子遂去之衛是年自衛將適陳畏於匡反衛明年丙午去衛過曹適宋伐木於桓魋去適鄭過乎宋之野聞有童謠曰楚王渡江得萍實大如斗赤如日剖而食之甜如蜜孔子識之至鄭爰有喪家之誚遂來陳

王子司城貞子家藏餘有隼集陳侯之庭而死楛矢
貫之石矝其長尺有咫陳侯使人以隼如孔子之館
問之孔子曰隼來遠矣此肅慎之矢也昔武王克商
通道九夷八蠻使各以其方賄來貢使無忘職業於
是肅慎貢楛矢石矝長尺有咫先王欲昭其令德之
致遠也以示後人使永鑒焉故名其楛曰肅慎氏之
貢矢分大姬配胡公而封諸陳古者分同姓以珍玉
展親分異姓以遠方職貢使無忘服故分陳以肅慎
氏之貢君若使有司求諸故府其可得也使求得之
金櫝如之居陳三載會晉楚爭強更伐陳及吳侵陳

陳常被寇于是孔子去陳弟子陳人公良孺者以私車五乘從至二十八年己酉爲陳湣公十年其春孔子復自衛來以靈公問陳及仰眎蜚雁故是時陳侯方起陵陽之臺未畢役死者數十人又執三監吏將殺之孔子既見陳侯與登臺觀之陳侯曰昔周作靈臺亦戮人乎對曰文王之興附者六州六州之衆以予道來不日成之何戮之有陳侯赦所執吏遂罷役夏桓僖廟災南宮敬叔救火孔子聞之曰災必於桓僖廟乎已而果然秋季桓子病嘆曰昔此國幾興矣以吾獲罪於孔子故弗興也顧謂康子曰我卽死若

必相魯相魯必召仲尼後康子代立欲召仲尼公之
魚曰昔吾先君用之不終爲諸侯笑今又用之不能
終是再爲諸侯笑康子曰然則誰召而可曰必召冉
求於是使使召冉求將行孔子曰魯人召求非小用
之將大用之也是日孔子曰歸與歸與吾黨之小子
狂簡斐然成章不知所以裁之子貢知孔子思歸送
冉求因誠曰卽用以孔子爲招云冉求旣去明年庚
戌孔子自陳遷于蔡往來葉蔡間三年敬王三十一年
壬子陳潛公之十三年也是年春吳伐陳楚昭王
來救及渡江果有物大如斗圓而赤觸舟舟人以獻

昭王怪之使使問於孔子孔子曰此萍實也剖而食之吉祥也惟伯者爲能獲焉昭王食之大美至是軍於城父聞孔子在陳蔡之間遣使奉金幣來聘宰予冉有曰夫子之道至是行矣遂請見問孔子曰太公勤身苦志八十而遇文王孰與許由之賢孔子曰許由獨善其身者也太公兼利天下者也然今世無文王之君也雖有太公孰能識之乃歌曰大道隱兮禮爲基賢人竄兮將待時天下如一欲何之旣見楚使遂往拜禮焉出陳蔡陳蔡大夫相與謀曰孔子聖賢其所刺譏皆中諸侯之病今者久留陳蔡之間諸太

夫所設行皆非仲尼之意楚大國也業聘孔子孔子
用于楚則陳蔡用事大夫危矣乃相與發徒役圍孔
子于野不得行絕糧七日從者病莫能興孔子愈絃
歌不衰乃召子路而問也曰詩云匪兕匪虎率彼曠
野吾道非乎吾奚爲至于此子路慍作色而對曰君
子無所困意者夫子未仁與人之弗吾信也意者夫
子未智與人之弗吾行也且由也聞諸夫子曰爲善
者天報之以福爲不善者天報之以禍今夫子積德
懷義行之久矣奚居之隱也子曰由未之識也居吾
語汝汝以仁者爲必信也則伯夷叔齊不餓死首陽

汝以智者爲必用也則王子比干不見剖心汝以忠者爲必報也則關龍逢不見刑汝以諫者爲必聽也則伍子胥不見殺夫遇不遇者時也賢不肖者才也君子博學深謀而不遇時者衆矣何獨丘哉且芝蘭生于深林不以無人而不芳君子修道立德不以困窮而改節爲之者人也生死者命也是以晉公子重耳之有霸心生于曹衛越王勾踐之有霸心生於會稽齊桓公小白之有霸心生於莒故居不隱者思不遠身不佚者志不廣庸安知吾不得之桑落之下乎子路出召子貢告如子路子貢曰夫子之道大也故

天下莫能容夫子，蓋少貶焉。子曰：「良農能稼，不必能
穡；良工能巧，不能爲順。君子能修其道，綱而紀之，統
而理之，不必其能容。今爾不修爾道而求爲容，賜爾
志不廣矣。」思不遠矣。子貢出，顏回入，問亦如之。顏回
曰：「夫子之道至大，故天下莫能容焉。雖然，夫子推而
行之不容，何病？不容然後見君子。夫道之不修也，是
吾醜也。夫道旣已大修而世不我用，是有國者之醜
也已。無與矣。夫子何病哉？不容然後見君子。」孔子欣
然而笑曰：「顏氏之子，使爾多財，吾爲爾宰。於是使子
貢至楚楚昭王，興師迎孔子。然後得免。子貢執轡曰：

二三子從夫子而遭此難也其弗可忘已孔子曰惡
是何言也語不云乎三折肱而成良醫夫陳蔡之間
丘之幸也二三子從丘者皆幸人也列士不困不成
行困之爲道從寒之及暖暖之及寒也惟賢者獨知
而難言之也易曰困亨貞大人吉無咎有言不信聖
人所與人難言信也於是遂去之楚

舊志

陳蔡十賢

顏淵魯人名回顏路無繇之子也路少孔子六歲孔子
始教首授學焉已遣回事孔子孔子亟稱之事載論

諸家語

閔子齊名損魯人曾見孔子有菜色孔子切磋之以至
道而襄之於孝德芻豢之色益如也得深已唯是不

仕欲隱約以明道

函史

冉伯牛名耕仲弓名雍蓋同族魯人也伯牛靖無欲孔
子節小物必以伯牛侍曰吾以自厲也

仲弓重厚簡默在貧如容使其臣如借不遷怒不深怨
不錄舊罪其自言曰居敬行簡凝於德矣

函史

子貢衛人名賜性警悟善說辭

事並見論語家語暨前紀中

宰我名予信孔子以爲賢於堯舜而孔子常告之以鬼
神情狀亦通明之才史稱其爲臨淄大夫與田常作

亂孔子恥之然呂覽則言陳恒攻宰予於庭卽簡公

於廟則予非助亂者也死於亂者也

函史

冉有名求仲弓族人學文博藝省物而勤己其行恭老

慈幼溫然退讓焉

函史

李路魯卞人名由性伉直有勇力不爲不義屈從孔子

於陳蔡之間絕糧七日孔子絃歌子路入見曰夫子

之歌禮乎孔子弗應曲終而曰由來吾語汝君子好

樂爲無驕也小人好樂爲無懾也子路悅援臧而舞

之三終乃出明日免於厄

函史

子游名偃吳人慕聖自吳如魯受學於孔子

函史

子夏衛溫人也名商篤信禮守故孔子自曾子而下篤信稱子夏而文學大著叙詩傳禮而孔子嘗屬其傳

易春秋云

函史

厄臺文

並銘

宋學士

王禹偁

天地厄於晦明日月厄於薄蝕山川厄於崩竭聖人生而肖天地之貌稟日月之靈鍾山川之粹得無厄乎所以帝舜厄於歷山大禹厄於洪水成湯厄於夏臺文王厄於羑里我先聖厄於陳蔡其道一也於是周室卵危魯道迷潰仁義路塞奢侈源開列國用權蝟芒而起壞禮樂爲糠粃視詩書如蕘菟孩提王室

翼壞儒風俎豆不修軍旅用事苟有衣縫掖而冠章甫者鮮不援戟而叱之三綱五常蓋掃地矣吾夫子抱帝王之道處衰亂之世痛五教之大壞嫉四維之不張剝道德爲舟楫將欲濟天下之墊溺斷禮法爲耒耜將欲芟天下之荒穢故不程其力不顧其勢聚三千之徒聘十八之國應機設教與世垂範然佩蘭於鮑肆孰聞其香施法於亂主孰致其政所謂天柱將傾折建一椽而扶之厥惟難哉故教不用於哀定位不崇於季孟辭遜於陽貨見忌於子西况文行忠信果得用於世耶卒致天厭聖道絕糧於陳顏冉

徒餒目相視我先聖則坦爾無悶慘然自居腹空腸
乾未嘗太息蓋聖人爲人也不爲己也憂道也不憂
貧也但欲緩皇綱之絕緒闢帝王之坦途酌三代之
禮文垂萬世之典則彼王澤浸於生民苟道至於是
雖不食而死復何憾哉吁奸喉佞舌者圖一日之飮
道醉德飽者謀萬世之利故教不用於當時而用於
今世位不顯於生前而顯於歿後何則祖述憲章之
義雷行上下之間俾夫爲君臣父子者不可須臾離
也得非用於今世耶名載典籍身享廟食得非顯於
歿後耶與夫圖一日之飮者又何遼絕哉余客在宛

邱得觀斯臺之地披蔡訪古馳筆而銘自僭祿尸位
殃則絕祀所謂伊人若敖之鬼夫子耻之不其餒而
飽德醉義歿則垂世所謂伊人箕山之土夫子求之
可謂仁乎巍巍聖人生而道迤歷聘求合絕糧於陳
箕山之土可齊其名若敖之鬼決非其倫廟食其匱
祀典惟新我來舊國荒臺磷磷拂石勒銘德音益振
祭絃歌臺文

明御史

吳悌

嗚呼夫子之聖天不可階夫子之厄日月之靈則陳
蔡之事又何足損夫子之聖哉昔舜入山澤雷雨弗
迷夫子在陳絃歌書詩譬之天地毋冥萬變太虛湛

然起滅如幻世之一切事變豈能爲孔虞患乎嗚呼
厄臺有隣太昊之宅二聖相望百王所則悌等式陳
時奠有馨惟德精爽在天陟降有赫尚饗

祭絃歌臺文

明僉事

林大春

惟師志在東周轍環天下道大莫容絃誦於野遺蹟
千古懷古感時瞻仰無窮謹以牲帛醴齊粢盛庶品
式伸殷薦尚饗

重修絃歌臺記

康熙二十一年

州教

蕭國弼

絃歌臺者孔子厄陳絃歌之臺也春秋時楚昭聘孔
子至陳有絕糧之厄孔子與諸賢七日間絃歌雍容

雖有虎兕曠野之喻而天懷落落淡如也陳人思聖人而不得見乃廟之像之并諸賢而塑之亦高山仰止之心耳前副使徐公易厄臺而名以絃歌是深知聖人之身雖厄而聖人之心不得而厄也余庚申自鎮平膺簡命吏陳見其殿宇摧折陞垣頽圯遂與廣文徐子徘徊籌畫極欲修葺柰陳當水旱之餘百姓饑困田廬荒蕪乃宵衣旰食百方拯濟歷兩歲之憂勤甫登一日之盈寧余於是捐貲於辛酉之夏既先修其墻垣於壬戌之春復重新其殿宇廣文徐子同心協力率庠主陳思濟等鳩工督理其郡中紳士各

隨其量以助焉數閭閻而告竣凡向之甃瓦朽棟今悉爲堂構之焜煌向之蓬苑草砌今悉爲官墻之燦爛訪得學行兼優之儒誦讀其中收陳之子弟而教誨之俾聖人絃歌之風再振於昭代豈必鄒魯之狂狷可裁成也哉

重修絃歌臺記

康熙五十二年

雅牧

顧瑛

守陳之明年遇總憲揆公有重修絃歌臺之役竊幸躬逢盛舉與邑人士樂觀其成也越二年而竣事殿宇之崇閎廊廡之修整皆殊舊觀其俎豆籩筐壘爵之數夙昔所未備者罔不具焉百年之廢一朝而

舉而恢鴻鉅麗過之其足以快一時之觀瞻者何如也落成日公爲文以志其緣起而曰聖跡所留不得聽其終廢夫公未嘗官此土游此地親見夫宮墻之蕪沒廟貌之傾圮也一聞其狀卽捐資以圖修復有須臾不及待之慮何哉夫志其闕名其鄉世於賢人君子尚有希慕之至而欲其流傳者况聖人之游處乎况公之夙志乎聖人之道者乎直其不能聽斯臺之終廢也盖今道術昭明文教聿昌

翠華巡幸所至聖賢遺跡皆令修舉

宸章之錫昭若雲漢一時賢公卿莫不仰承德意故斯臺

亦待公而新也於戲事不誠有時歟臺之有祠昉於明之中葉然皆草創之爲不數年而輒事修葺故不能久也若茲之良材堅甃周以石柱可久不廢其所以妥先聖之靈者旣孔固矣至若藏書有閣講藝有堂栖士有舍俾向學者得以游息絃誦其中則公之陶成此邦之人士者亦未有艾也珽愧不能盡守土之職樂公此舉之爲盛事故謹爲記以附於後云

重修絃歌臺記

康熙五
十三年

都御史

揆敘

陳州城外西南隅傳爲孔子絕糧地明成化六年知州事戴昕建祠名曰厄臺嘉靖中巡按御史趙繼本

更名絃歌至今沿焉祠屢修屢廢有以告余者因計其費使人鳩工飭材葺之俾復其舊竣事於康熙五十二年十一月初十日其邑人備述興廢之由及山原林麓環拱之勝因董役者以請記於余余思之旬日而未得所以爲言之道焉將陳夫子之道與德歟則乾坤之容日月之光不可繪畫且語之至者已具於前賢矣將謂茲臺爲邑人所瞻仰與今四海九州郡縣之學皆有夫子廟堂見者不戒而肅亦不係於茲臺之廢興至於山原林麓之觀又不足道也是役也特以至聖遺跡所留旣以來告不得聽其終廢故

第書所緣始以及畢工之日月云

書院

陳州府絃歌書院在絃歌臺後初爲思魯書院前太守
金公更其名曰絃歌書廳五間廳之上書樓五間東
西廳各三間由東西廳而北東西書房共三十餘間
書廳之後簷廊三間廚房一間東西書屋廚房各一
間四面圍墻古木參差內外掩映院門一座題其石
曰絃歌書院

書院田地共六頃六十三畝零租銀一百九十二兩
一錢乾隆五年各官及紳士捐置立碑詳載

絃歌書院碑記

乾隆五年

郡守

金

山

書院之設造士也陳郡治二焉其一隸畫卦臺無誦
講之堂無休息之舍師弟子相與於栖神一字朝聚
而暮散矣其一隸絃歌臺臺之後樓五楹廡左右三
楹周垣屬於臺門如異宮額曰思魯地有餘閒列以
卉木花發生意鳥說天機每一過之令人憶疇昔讀
書時未易得此也而師徒朝暮亦復落落晨星其故
安在夫古人造士慮龐雜而處之閒燕畫卦臺者久
矣尸祝居之勢固不得與之爭聚而肄業其時少散
而見外物其時多處非其所良無足督若絃歌臺則

既幽敞而專矣語云百工居肆以成其事今士人
學曾不風雨明晦於事事之地學業其焉成雖然有
可居而弗恒厥居荒嬉毀隨學人之責也授之居而
不盡所居具文故事亦長人者之責也爰分俸先屬
而都閩趙君助焉紳士輸焉得金六百有奇結屋二
十餘楹於樓廡卉木之隙鳩庀工材高氏驩孟氏調
有力焉一增前所未有經冊具几席修庖溷設俾諸
生修藏游息其中延良師董戒朝夕用底厥成則汰
其畫卦臺者並修脯之田歸於一蓋博廣厲之名二
書院不爲多崇有造之實一書院不爲少矣易前額

曰絃歌從地也亦奠陳人之學道於魯乎何思

太康縣二賢書院雍正七年許宅基變價入官十二年
知縣吳本涵詳請改爲書院乾隆八年知縣宋士莊
見堂房圯壞捐俸重修

二賢書院記

太康令

宋士莊

書院之設安先賢亦以育人材也康邑舊書院在關
外寇燬前令朴懷寶移建聖廟東旁雍正七年有許
姓宅入官十二年吳令本涵詳請移爲陽夏書院前
門房各三後樓堂上下房左右小院別業各一牆外
草瓦屋四十餘所賃民居歲久傾頽誦讀亦寢士莊

承乏於茲惜其風雨不蔽仰見天日捐資百餘金瓦
門堂寢舍樓牆悉加修葺計兩閱月王竣廉邑故有
二賢祠在縣東偏湫隘剝蝕乃於書院旁隙地敗屋
因舊瓦石出俸三十兩建祠堂三楹遷主祀焉改書
院爲二賢書院每歲捐俸五十金延師教授其中絃
誦之聲雍雍如也書院有閒地數頃瀉鹵不可治歲
僅入屋租七兩膏火之費正俟續增諸生徒踴躍重
興恐久而弗繼請紀其顛末予不獲辭乃應之曰刀
削之美不居其肆不成材也弓冶之傳不資其良無
善技也因思康邑數十里間高陳並生年少而質美

負笈擔囊從師千里外登闕里之堂共事聖人學成名彰昔之豪傑者有然矣後生小子足不出鄉里優游庠序之中模範當前不特師友親承抑且高賢景仰不徒詩書流其華抑且德行示其則觀於二子之問答好學則親賢友善之意可以興矣觀於執喪思哀則孝弟慈柔之心可油然而生矣觀於徑實不由則光明之懷正大之操可以修其行而立其義矣夫如是教化還醇品質茂美學校秀而登之國家材而用之以是日對二賢庶幾少媿若猶是白壁紅欄旅進旅退雖慕名誦讀卒鮮實效尙非所以爲二賢書

院之弟子勗

扶溝縣明道書院舊址莫可考今在南街路西康熙二十九年知縣繆應晉創建三十五年知縣趙如桓增設經蒙兩學其後知縣吳士熹集邑士夫耆老謀於臺之東建成人有德堂及諸生號舍臺之西建小子有造堂再西爲射圃乃僅構講堂三楹餘以老疾休致去五十六年知縣郁士超又建敬業堂三楹於東雍正六年知縣秦鑄建節孝祠於內割其西平分之規制遂狹小云

重修明道程夫子祠碑記

邑人

杜俊章

明道先生以河洛名賢從祀孔廟天下郡邑之所同而其以臺諫出宰兼有專祀扶邑之所獨也先生謂叢爾一邑道之興廢關焉故其出治必以教化爲先一時游楊諸子列在講席從遊茲地者彬彬然有洙泗絃誦之風先生舊於公署右築亭游息臺址巋然後之人謂樹標莫如崇賢育才無如敬業乃易亭爲祠移建於邑之西南衢顏曰明道書院肖先生及二子像於殿上昭崇敬也規制宏敞歌咏時聞歷世旣久圯壞傾頽弗稱厥典官斯土者每欲更新焉而未能會三韓康侯高公來尹茲土數年間興衰起敝百

度維新顧瞻祠宇慨然興懷曰先生雖往典型斯在
圯而不修司政教者謂何乃捐俸掄材計日鳩工頽
植朽易創豎三楹廟貌丹碧道範儼若崇門周垣以
次修舉閱數月而訖成於是士迥濂洛之統人興矜
式之懷是先生道化固不僅在一邑而在是邑尤爲
信而足徵矣按先生在宋神宗朝敷事陳言矩度雍
容不阿權寵侃侃有大臣誼一日議事朝堂安石方
盛氣以待先生怡然曰天下事非一家之私何必乃
爾安石爲之愧屈卒以數忤執政僅得外遷其蒞扶
也首揭視民如傷於座右因勢利導隨事匡濟化盜

爲民則焚舟之患息濬溝通渠而壅水之害除發貸
饑之粟均蠲稅之惠以至輸役免賦而民困立蘇青
帳爲供而宦侍氣奪其遺愛餘蹟載在傳記者班班
可考尤著者倡明道學續絕斥非遊於其門者固多
君子至若定夫以文行交士曾見稱於伊川中立之
經史潛心卒知名於海國當其興道講學固表表在
人耳目者扶獨何幸而親德輝沐教育由是百世不
忘崇其祀思其人因以遵其道此固秉彝好德之不
容已而公之是役實先得同然之心矣乃若我公之
治扶也親扶猶家視扶之人猶其子若姓凡可以計

長久而貽燕翼者靡所不至而諄諄勸諭懸書月吉者大約以孝友仁讓崇正闢邪爲務其與先生化民成俗之意若異世而同揆焉繼自今被其澤者永其慕觀茲建立謂卽我公之甘棠焉可矣一日廣文孫君造予曰邑有程祠人心風教所繫萬代瞻仰在公此舉子宜有言勒之石以詔來者俾永勿壞章不敏佩服前哲樂觀盛事方欲推公之意闡先生之道化於無窮也於是乎不辭固陋而敬爲之記公名錫爵字康侯廕生三韓人學博孫君名達字仲儀貢士雪苑人典史張君純仁燕山人預於是役之勤者例得

並書

重修明道程夫子祠碑記

扶溝令 吳士燾

扶邑有明道程先生祠其來已久先生爲宋室理學大儒以道從祀文廟春秋祭享遍天下郡縣皆然而專祀扶溝者以先生曾臨蒞斯土教化德澤淪浹人心扶人尊而仰之思其人圖其像歲時祭享不替示不忘也按先生當神宗時以御史臺抗談時政忤王安石調知扶溝先是扶之奸宄瀕河爲患每焚舟掠財先生捕得之不遽加以法引其類而使之力業悉皆傾心向化自是焚舟之患息商民賴之民苦賦煩

先生歲請蠲除免輸役更爲之立法令今歲獲免者
明歲先輸於是惠澤均而恩膏溥諸如請發粟而賑
饑立學校而興教不阿權寵以厲民此皆本聖賢心
性之學出而理物寧人故能風移俗易教化大行使
此邦人士咸蒙其福而被其澤也則扶人之謳思不
置而俎豆不廢也豈不宜哉因歷年旣久墻宇傾頹
門闥臺垣苔封蘚蝕予每瞻拜宇下久悚然動懷會
郡司馬趙公慨然募貲力贊其成而予以減俸爲倡
於是鳩工庀材植傾更朽不數月而工畢焉至先生
及游楊遺像皆令崇飾如舊而門前墻垣亦無不完

續整飭爛然一新矣是役也量力輸貲者邑之縉紳
士大夫而募捐董率實邑庠生張子桐叟盧子寬張
子應宿何子功馭劉子謙高子光瑞謝子家樹何子
功振李子之屏之力也若夫聞風慕義而樂捐助修
者有司吏宋經例亦得書云

西華縣演疇書院在縣治東知縣介錫齡率貢生李峻
極捐設

商水縣義學在雲路街西其地南至城北至街雍正八
年知縣王夔龍捐置復買舊樓一座蓋造未竟卸事
去十一年知縣牟繩祖勸捐修建講堂五間乾隆元

年知縣張淑載倡捐增修四年知縣李新猷邑侯選
知州李震普捐修五年震普歿其弟震興堂弟郊姪
樹勲復繼其志十年知縣張崇樸繼修

生息銀六百五十兩知縣李新猷捐俸五十金邑紳
士共捐六百元攤寄各典每年生息一百二十餘兩
以爲延師脩脯之費

商水縣增修義學碑記

邑命
張淑載

灑川密邇淮陽古稱名勝自我

朝定鼎以來德化翔洽人文蔚起較昔尤盛其因材造就
非義塾不爲功是以天津王公夔龍攝篆茲土卽議

建立義學捐貲售地庀材鳩工爲營繕計未幾以調
任中止潼川牟公繩祖繼之建藏書閣講堂各一功
未竣亦解組越半月而余來尹茲邑旣下車與聞兩
公育材雅意歡其爲政能急先務遂殷殷欲步後塵
然工程浩繁兼以初登民社簿書叢集無暇及此踰
一載乃得謀於廣文東君束君告余曰此盛德事大
有造於商者也公第先爲之倡擇日興工風行草偃
理所必然况紳士常太息王牟兩公盛意未遂某當
會二三僚友竭蹶倡捐人之好善諒有同心余然其
言捐貲擇日屬庠士之職事練達者王廣運王鳴岐

二人監修而以束君董其成一時紳士咸踴躍從事
量力樂輸於乙卯夏濤和之十有八日興工至乾隆
丙辰四月告竣凡昔所已建而工未就者補之如藏
書閣講堂是也昔所未建者增之如東西齋房儀門
大門四維墻垣是也於此聊加潤色規模粗具復爲
購經史古文若干卷鑄大刀一口十二力式弓一張
試石一塊置其中延師設教俾文武生童之來學者
不慮誦習無地師資乏人切劘漸漬之久將處爲名
士出爲良臣賢才起而風俗淳庶王牟二公之志可
慰而余亦或可塞責於厥職歟後之君子蒞斯邑者

均有造士之責因其基而擴充之使義塾永新人文日盛是余所厚望也夫

項城縣 虹陽書院在文昌閣西康熙二十七年知縣顧

芳宗 捐俸創建後知縣錢國寶顏其額

義學 田在縣東常家樓康熙二十九年知縣顧芳宗

捐俸 置小地三頃零墾種收租以供師生膳餼之用

陳州府志卷之八

楚鄂崔應階吉升氏纂修

聖蹟

聖人刪書雖斷自唐虞而大易繫辭則自庖犧氏之
畫卦始蓋其仰觀俯察近取諸身遠取諸物始作八
卦以通神明之德以類萬物之情者寔道統自此開
也洪荒以前皇居莫考帝王之有都亦自陳始舊志
分載古蹟陵墓未盡尊崇之道今悉編入聖蹟商高
宗恭默思道嘉靖殷邦繼乃烈祖格於皇天亦附列
焉似得體云

建都 神農附

太昊伏羲氏成紀人也

天水郡有成紀縣今鞏昌府秦川是也

風姓以木德

繼天而王都宛德合上下天應以鳥獸文章地應以

河圖洛書於是仰觀象于天俯觀法于地中觀萬物

于人始畫八卦以通神明之德以類萬物之情于是

神著著地乃以著爲筮一十八變而成卦以斷天下

之吉凶袵離象法螯狐作爲網罟以畋以漁化鱗鱗

爲總布給其衣服因網罟以建都市神龍降瑞以龍

紀官乃命子襄爲飛龍氏造書契書制有六一日象

形二曰假借三曰指事四曰會意五曰轉注六曰諧

聲使天下義理必歸文字文字必歸六書以同文而

代結繩之政盡地之利分壤蒔穀以制國用正百姓

通媒妁以重萬民之儷儷皮薦之

儷鹿皮也又雙皮也

以嚴其

禮示合姓之難而民不瀆聚銅以爲棘幣外圓法天

內方法地以定輕重以通有無

太昊幣謂之九棘詳見發揮昔寶鼎尉王

樽家有一布長寸六分肩廣八分首廣五分足闊二分重六銖面文作行吳乃帝昊字幕文作引季彥美所謂了傍斜畫者蓋羲字也又董令昇家有一種長寸八分額廣六分肩廣寸一分奇間五分重十二銖面文作父昊皆太昊字也治針砭以拯夭札而民滋壽命子英爲

潛龍氏升敷教之臺而作甲歷以示民故星辰順而

歲月日時無易命金提主化俗之政指苦蓋謹窖藏

以靖敷民而除其災害命烏明建方泐窳木絕港道
以濟不通命視冒音墨爲甦志災厄察虛實居百賙以
平民命紀侗中職定田賦於中邦仲起司陸王平土
之政陽侯司海王水政是謂六佐又有蜚龍氏王河
圖靈籙獻南王占卜以前民用芒王九庖以祀上帝
而和神明蹇修爲士以之御敗而下精至郝骨氏立
制使天下共守而不敢越百令具舉而天下治長離
鳳來翔爰作荒樂歌扶袿詠網罟以鎮天下之人命
曰立基斲桐爲琴繩絲爲絃絃二十有七命之日離
徽以通神明之貺絙桑爲琴其絃三十有六以修身

理性還其天真而禮樂於具興焉其爲治也去羨去

慕惟以道化是以事簡俗淳功揆上下泐八方而後

不可及也在治百六十有四載壽年百九十有四葬

於宛邱以上參用小司馬補史記王子年拾遺記鄭樵通志羅泌路史陳士元荒史

炎帝神農氏姜姓繼風姓而王都於陳初帝生三歲而知

稼穡般戲之事必以禾稷日於淇山之陽求其利民

宜久食之穀而藝之天感嘉生菽粟誕苓神農灼其

可以養民也於是因天之時分地之利以教天下播

種耨木爲耜撓木爲耒制晦清畊而戒之耕爰申國

禁亡教人所務而農得以順其時教之桑麻以爲布

帛相土停居令人知所趨避乃命赤冀創採鉄爲杵
白作耜耨錢鑄楨鬻井竈以濟萬民燧盭劓鑿以蒸
以菴民始播食而不勝有火瑞官長師事悉以火紀
故稱炎焉列慶於國曰中爲市致天下之民聚天下
之貨交易而退各得其所而有平於是俱興乃紀上
元調氣朔以端起闕拂焄蒿辟戶隙以逃民害三光
會於攝提七曜起於天關所謂太初歷也乃命司怪
主卜巫咸巫陽主筮通其變極其數八八成卦而取
良以爲始所謂連山易也民有疾病未知藥石乃嘗
草木而正名之審其平毒旌其燥寒稽其畏惡辨其

臣使病正四百藥正三百六十有五著之本草立之
方書詵告以利天下而人得以繕其生粵又制請雨
之法蓋南置水掩骼埋胔以待天澤之至赤松子者
諸侯也移老壤城於是下之致爲雨師每歲陽月盍
百種率萬民蜡戲於國中以報其歲之成是故淳鹵
作而人民毓教化興行耕桑得利而究年受福乃命
刑天作扶犁之樂制豐年之詠調雅琴度瑤瑟以保
合大龡而閑民欲於是神澧漢嘉穀苗乃命屏封作
穗書以同文效令命白阜甄四海紀地形辨方正位
經土分域處賢以便勢而王者以家焉乃課工定地

爲之城池以守之后歲省方觀民設教明堂爰崇郊
祀封岱禪云以大報而天下治補遂不悞乃伐補遂
而萬國定故其民樸重端慤窪尊曰飲竦身戴聽以
陶乎至化是以刑罰不施於人而俗善不忿爭而財
足不勞形而功成南交北幽三危暘谷俱優之人靡
不戾止故黃龍川泳丹渠先產風不鳴條雨不破劑
亡札瘥沈熇之怒而天下共尊共富之懷其仁義之
心後遷都於曲阜在位百四十有五載壽年百六十
有八其崩也天下聞之不將者七日焉娶承桑氏之

女生子十有三人

參用同上

陵廟

太昊陵在府城北三里許隋以前未知崇奉唐太宗貞觀

四年始禁民芻牧周世宗顯德元年勅官吏禁民樵

采耕犁宋太祖建隆元年始置守陵戶乾德元年詔

三年一饗以仲春之月牲用太牢祀官以本州長官

有故則上佐行事官造祭器四年詔立陵廟置守陵

五戶春秋祀以大牢御書祝版開寶四年增守陵戶

二定配享儀以時薦祭

以朱襄
吳英配

牲用羊豕九年命修

祠廟真宗咸平元年詔葺陵廟景德元年詔修陵墓

大中祥符元年詔加崇飾天禧元年申禁樵采徽宗

政和三年定新儀春秋享太昊於陳州以金提勾芒
配靖康後祀事不修廟貌漸毀至元末蕩然無遺明
洪武三年訪求帝王陵寢四年駕幸陳御製祝文致
祭八年遣官行視陵寢九年置守陵戶二人正統十
三年知州張志道奏立寢殿廊廡戟門厨庫宰牲等
房天順六年知州萬宣同知李鼐復加修葺立後殿
鐘鼓樓齋宿房具祭器又作三清觀居焚修道士吏
目汪澄改立前門成化六年知州戴昕起敬易堅莊
嚴帝像增高鐘鼓樓綵繪殿宇金碧輝映十二年監
生鄭諤奏准重修嘉靖二十四年監察御史吳悌見

廟貌傾頽陵塚坦夷與叅政金清僉事李維藩
命通判范汝敬董役而大修之落成祭告三十八年
監察御史孫昭命知州伍思召修葺萬歷四年督學
副使袁貞吉奏留輸帑三千金又大修之其規制南
臨蔡河之濱曰樞星門左坊繼天立極右坊開物成
務次券門三扁曰先天又次舊爲無梁殿歲久材朽
亦改磚券門三闔其內戟門門內鐘鼓樓樓北正殿
五間雕墻黃瓦稱爲帝居後殿規制頗同前其後磚
甃高臺上建翬閣下爲券門扁曰太始而閣貯御製
碑焉門內則陵陵前樹碑大畧曰太昊伏羲氏之陵

陵下築方臺臺周砌磚垣垣南亦闢三門左右蔣著

草垣內外樹松栢後殿垣外左有真武廟右有三清

殿

副使翟師雍曰陵寢豈宜雜以廟今毀

皆焚修者所居也真武殿前

更衣亭五間亭左右有廂前有門亭西岳忠武祠

今移

城內三清殿前宰牲堂五間堂左右有廂前亦有門此

皆在內垣之外外垣之內則焚修者所耕也陵地凡

三頃五十畝袤四百五步廣二百七步北至民人徐

通地東至大路張雨地西至大路汪珣地爲界天啟

六年睢陳道唐煥知州林一柱捐金重修後連雨傾

壞

國朝順治十五年知州王宏仁捐百金申文部院賈捐五十金十六年知州王士麟復捐百金設簿勸捐積二百金於十七年三月委吏目陳可久以次修葺康熙七年知州方子光重修復其舊二十八年知州王清彥捐俸重修植松栢設祭器三十二年冬知州張喆周覽四隅見有遺址詢之父老知舊皇墻明季壬午爲闖寇毀謀於紳士捐俸積衆資鳩工庀材砌以磚灰高九尺袤六百丈雉堞聳峙

本朝崇禮古先帝王歷遣官致祭乾隆十年奉

旨發帑八千兩知府崔應階監督知縣馮奕宿承修規模

陽州府志 卷之八
壯麗輪奐輝煌內外城垣鞏固莫不煥然丕新焉

祭文

明洪武四年遣會同館副使路景賢祭文

朕生後世爲民於草野之間當前元失馭天下紛紜乃
乘羣雄大亂之秋集衆用武荷皇天后土眷佑遂平暴
亂以有天下主宰庶民今已三年矣君生上古繼天立
極作蒸民主神功聖德垂裕至今朕典百神之祀考君
陵墓在此然相去年歲極遠朕觀經典所載雖切慕於
衷奈稟性之愚時有古今民俗亦異惟仰神君萬世所
法特遣官典祀於陵聖靈不昧尚其納焉

洪武十二年遣知州張密

惟神功施於時德裕後世仰瞻陵寢必當謹禮朕有天
下首勅所司凡有古先帝王陵寢常加修理以附近人
看守常年祭祀已有成式尚慮追崇禮有未至故十三
年秋祭特致其嚴神其鑒知

永樂元年遣官致祭

自古有天下功德及民者當享百世之祀我國家崇祀
古者帝王厥有常典今朕尊奉祖訓奉天征討卽位之
初永惟聖帝明王陵寢所在不可不敬是用奉香帛牲
醴以祭惟皇有治世之功有安民之德歷代雖遠神靈

不亡其尚默贊玄化孚佑邦家永臻太平之福朕其敬
祀萬世無斁

弘治元年五月遣興安伯徐盛

於惟聖神挺生遠古繼天立極開物成務功化之隆惠
利萬世茲予祇承天序式修明祀用祈鑒祐永祚我邦
家尚饗

弘治十四年遣知州白思義

昔者奉天明命相繼爲君代天理物撫育黔黎夔倫攸
序井井繩繩至今承之生民多福思不忘報茲特遣使

齋捧香帛祇命有司詣陵致祭惟帝英靈來歆來格尚

饗

嘉靖三十年八月丁亥遣河南撫按潘恩孫昭

惟神奉天撫世奠境保民聖德神功萬世攸賴茲者適
因地震致將河南懷慶等二府衛陝州靈寶等五縣城
垣壞損官民房舍倒塌壓死人口不計其數守臣具實
上聞朕不勝惶惻茲遣大臣敬齋香帛往詣祭告伏冀
聖靈鑒佑默相化機轉災爲祥地方其永依庇焉謹告
萬歷三十一年八月遣開封府陳州知州羅林

追維明德奉天撫民盛治宏勳萬世永賴陵寢所在英
爽如存茲特遣使齋奉香帛祇命有司致祭惟神鑒歆

尚饗

皇清順治八年四月遣太常寺卿段國章致祭文

自古帝王受天明命繼道統而新治統聖賢代起先後

一揆功德載籍炳如日星朕誕膺天眷紹續丕基景慕

前徽圖追芳躅明禋大典亟宜肇隆敬遣耑官代將牲

帛爰修殷薦之誠用展儀型之志伏惟格歆尚其鑒享

康熙七年遣通政使霍叔瑾

自古歷代帝王繼天立極功德並隆治統道統昭垂奕

世朕受天眷命紹續王基庶政方親前徽是景明禋大

典亟宜肇修敬遣耑官代將牲帛爰昭殷薦之忱聿備

欽崇之禮伏惟格歆尚其鑒享

康熙十五年遣禮部右侍郎楊正中

自古歷代帝王繼天立極功德並隆治統道綽昭垂宇宙朕受天眷命撫御鴻圖懋建元儲前徽是景明禋大典亟宜舉行敬遣耑官代將牲帛爰昭殷薦之忱聿備欽崇之禮伏惟格歆尚其鑒享

康熙二十一年遣兵部左侍郎焦毓瑞

自古帝王受天顯命繼道統而新治統聖賢代起先後一揆成功盛德炳如日星朕誕膺眷祐臨制萬方掃滅殘克廓清區宇告功古后殷禮肇稱敬遣耑官代將牲

帛爰修禋祀之誠用展景行之志仰企明靈尚其鑒享
康熙二十八年遣大理寺卿陳汝器

自古帝王受天明命御歷膺圖時代雖殊而繼治同道
後先一揆朕承眷祐臨治萬方稽古禮文肅修祀事茲
以

皇祖妣孝莊仁宣誠憲恭懿翊天啟聖文皇后神主升祔
太廟禮成特遣嵩官代將牲帛虔修禋祀之典用舒景行之
忱仰冀明靈俯鑒誠悃

康熙三十五年正月遣太常寺卿熊一瀟

自古帝王繼天出治道法兼隆莫不慈惠嘉師覃恩遐

邇朕勤恤民依永期殷阜邇年以來郡縣水旱間告年穀歉登蚤夜孜孜深切軫念用遣專官秩祀爲民祈福異靈爽之默贊溥樂利於羣生尚鑒精忱俯垂歆恪

康熙三十六年八月遣兵部督捕左理事官胡會恩自古帝王受天景命制治綏猷必禁暴除殘以乂安黎庶緬懷往烈道實同符朕欽承

帝社臨御九圍茲以狡寇跳梁親征漠北蕩滌寇氛廓清邊徼永消兵革以與普天率土樂育太和敬遣專官代將牲帛昭告古先哲后虔修禮祀式彰安攘之模用展景行之志仰企明靈俯垂鑒饗

康熙四十二年五月遣都察院左副都御史張睿

自古帝王繼天立極出震承乾莫不道洽寰區仁周遐
邇朕欽承丕緒撫馭兆民思致時雍常殷惕勵歷茲四
十餘載今歲適屆五旬宵旰兢兢無敢暇逸漸致民生
康阜世運昇平頃因黃淮告成巡歷再授方畧善後是
期觀民志之歡欣滋朕心之軫恤遄回鑿馭大沛恩膏
用遣專官敬修祀典奠默贊郵隆之治益弘仁壽之休
尚鑒精忱俯垂昭格

康熙四十八年五月遣太僕寺卿祖允圖

朕惟自古帝王正位臨民代有令德是以享祀千秋用

昭鉅典朕仰荷天庥撫臨海宇建立元良歷三十餘年
不意忽見暴戾狂易之疾維祖宗洪業及萬邦民生所
係至重不得已而有退廢之舉嗣後漸次體驗當有此
大事時性生奸惡之徒各庇邪黨借端搆釁朕覺其日
後必成亂階隨不時究查窮極始末而確知病原皆由
鎮廓亟爲檢治幸賴上天鑒佑平復如初朕比因此事
耗損心神致成劇疾皇太子晨夕左右憂形於色藥餌
必親寢膳必視惟誠惟謹歷久不渝令德益昭丕極克
荷用是復正儲位永固國本特遣專官敬申殷薦尚祈

欣格

康熙五十二年遣都察院左副都御史明安

自古帝王繼天出治建極綏猷莫不澤被生民仁周寰宇朕躬膺寶歷仰紹前徽夙夜孜孜不遑暇逸茲御極五十餘年適當六旬初屆所幸四方寧謐百姓乂和稼穡歲登風雨時若維徵度之協應爰羣祀之虔修特遣專官式循舊典冀益贊雍熙之運尚永貽仁壽之休俯鑒精忱用垂歆格

康熙五十八年三月遣翰林院編修蔣漣

自古帝王受天景命建極綏猷垂萬世之經常備一朝之典禮朕欽承帝祉臨御九圍夙夜惟寅敬將祀典茲

以

皇妣孝惠仁憲端懿純德順天翼聖章皇后神主升祔

太廟禮成特遣專官代將牲帛用展苾芬之敬聿昭禋祀之
虔仰冀明靈尚其歆格

雍正元年二月遣大理寺卿覺羅常泰

自古帝王繼天出治建極綏猷莫不澤被生民仁周海
宇維我

皇考峻德鴻勳媲美前古顯謨承烈垂裕後昆朕以眇躬續
膺大寶當茲嗣位之始宜修享祀之儀特遣專官虔申
昭告惟冀時和歲稔物阜民安淳風徧洽乎寰區厚德

陽州府志 卷之八
常敷於率土尚其歆格鑒此精誠

雍正二年二月遣內閣侍讀學士班第

自古帝王體天立極表正萬邦愷澤遍於寰區仁風及於奕禩朕丕承大統邇契曩徽茲於雍正元年十一月二十五日恭奉

聖祖合天宏運文武睿哲恭儉寬裕孝敬誠信功德大成仁
皇帝主配享

闈丘禮成特遣專官虔由昭告惟冀永贊修和之治益昭安
阜之庥鑒此精誠尚其歆格

雍正十三年十二月遣太常寺卿王潯

禮崇祀典光俎豆於前徽念切景行薦馨香於往哲維
帝王繼天立極撫世誠民豐功焜耀於簡編峻烈昭垂
於宇宙溯典型於在昔凜法監之常存朕以藐躬繼登
大寶屬膺圖之伊始宜展祀以告虔特遣專官祇遵彝
典苾芬在列備三獻之隆儀靈爽式憑仰千秋之明德
尚其歆恪永錫鴻禧謹告

乾隆二年七月遣內閣學士兼禮部侍郎雙喜

自古帝王憲天出治建極綏猷德澤洽於萬方軌範昭
於百世朕纂承鴻緒景仰前徽茲於乾隆二年四月十
六日恭奉

世宗敬天昌運建中表正文武英明寬仁信毅大孝至誠憲
皇帝主配饗

園丘禮成特遣專官虔申昭告惟冀永祐雍熙之盛益昭安
阜之隆度鑒精誠尚其歆格

太昊陵牆門碑

州敬
王宏仁

蓋惟以尊莫大乎帝以本莫重乎祖故凡有功德於
世者或法施於民或以勞定國咸飾其廟貌著爲祀
典而况乎其爲帝而况乎其爲帝而祖陳州北蔡河
之澍

太昊伏羲氏之陵在焉舊創有寢殿廊廡戟門厨庫宰牲

等房繼立後殿鐘鼓樓齋宿房其秀門之前復闢三
門森若鼎峙而重垣環匝廣數百步儼然帝王之居
夫固所以尊之本之而崇其明祀也歲月滋深葺理
久曠雖殿宇猶存故貌而起視其陵寢則夷然矣門
楹則頽然矣牆垣則潰然矣余簡蒞斯土首謁陵寢
不禁愀然長嘆曰古帝王陵祠損卽修治憲綱所列
有司責也矧茲繼天立極開物成務之帝祖乎且天
地間海桑變更不知幾何而宛邱之陵萬古不改相
繩至今漸爾荒廢是安可不亟爲之所也自顧力微
扼腕無何比及歲始遠方祈禱者絡繹不絕因命廟

祝設醮募善擇者正公同登貯以爲葺理之資維時
余與同事諸公捐俸倡始而郡之紳衿相樂來助糾
香資而度之約可以經營矣乃鳩工庀材藉州佐劉
茂賢董其役殫力督率不踰月間向之夷然之陵塚
竟歸然而高阜矣向之頽然之門楹竟峩然而金碧
矣向之潰然之牆垣竟嶄然而朱堊矣起敝易堅輪
焉奐焉遂使過者興思瞻者加敬方次落成而秋霖
剝蝕殿宇又告傾矣厥功維艱厥費維鉅蓋天下有
心欲爲而事猶屬可爲者有心欲爲而事萬不易爲
者若是則余又不能不愀然長嘆矣雖然昔創而建

之者何人而今獨不能爲繼之乎嗣繼而葺之者何人而今獨不能爲復繼之乎抑以事之可爲而始爲之事之不易爲而遂聽之是豈所云致力於神乎爰是請之臺憲籌諸邦賢將必使告傾者燦然聿新而獲已焉然後此之功誠未可量也而今此之役其曷可泯乎敢勒石以記匪以爲名也匪以云報也蓋以誌同時之君子共勩厥事焉并以望異時之君子共盟厥心焉

增建陵廟圍墻記

康熙三十九年

熊一瀟

我

皇土御極三十有五年治化久洽湛恩汪濊文德武功之
隆於燦萬古猶孜孜勤求民瘼精禋昭格以永奠無
疆樂利之休孟春之吉

上御保和殿親擗祝簡頒香幣西遣在廷九列諸臣致祭

河嶽鍾瀆歷代帝王陵寢臣一瀟躬逢盛舉奉

命中州首詣

太昊伏羲氏陵前宣颺聖意盖尤爲鉅典云於是偕陪祭

衛輝知府臣胡慰先暨守土陳州知州臣張喆率文

武僚屬齋戒竭誠籩豆駿奔罔有不恪是日也天朗
風和川原葱鬱之氣浮於城邑盖恍然神遊上古皇

王之宇宙焉

臣一滿

不禁穆然而有會也仰惟

皇王繼天立極敷億兆年之文教治道統之傳同揆古今
是宜恭繕宸翰勒之貞珉以垂不朽永永無極至祝
事既成徘徊殿宇輝煌金碧其外見磚城環抱其東
西則石坊鼎峙規置宏敞望而肅然詢之同事咸謂
舊城悉皆土垣傾圯已久卽道之東西悉泥土平行
過之者不知此爲陵廟今磚城六百餘丈高九尺餘
以丹雘堅築基址務極經久闢南之東西各建新坊
以狀巍煥皆守臣節營度捐倡與紳士蘇應元高維
協力匡襄以成之也方厥功告成之日欣逢

帝命式臨之時運會相值有如此也夫能敬事神明者必
能和其人民今守臣詰能仰體

聖朝崇祀至意其敷政治民必其懷保安戴於無窮也是
矣不可不附書以昭勸夫後此者

商高宗陵在西華縣北長平鄉週二千二百步高約百餘
尺明季寇燹歷朝林木殿宇碑記焚盜一空僅存陵
土康熙二十九年奉撫憲閻捐資飭建拜殿三間頭
門一間

明洪武遣官祭商王高宗陵文

曩者有元失馭天下紛紜朕由此集衆平亂統一天下

今日四年矣稽諸古典堯舜繼天立極列聖相傳爲蒸
民王者陵各有在雖去古千百餘載時君當修祀之朕
與百神之祀故遣官齋牲醴奠祭修陵君靈不昧尚惟
歆饗

以後明代至

本朝遣官致祭告文俱與太昊陵同

陳州府志卷之八終

陳州府志卷之九

楚鄂崔應階吉升氏纂修

祀典 各祠附

昔太昊命芒主九庖修祀事而和神明祀典之設有
自來矣夫燔黍捭豚蕡桴土鼓猶致敬於鬼神歷代
以還禮樂旣備祀事益飭蓋以崇德報功薦達馨香
爲民請命也陳故太昊之都禮教之區今祀典所載
皆國家大禮肅將歲事孰敢弗虔抑史稱胡公大姬
時陳俗好巫覡樂歌舞將有祭非所祭者然風俗與
化移易今士庶所崇奉凡在前哲有功斯土又烏可

忽哉志祀典

陳州府

附郭淮寧縣

太昊陵

每歲春秋二仲月本府本縣祭各官具朝服禮與文廟同詳聖蹟

文廟

名宦祠

鄉賢祠

忠孝祠

節烈祠

俱詳學校

絃歌臺

詳聖蹟

社稷壇

每歲春秋上戊日祭設木主二左社右稷俱北向文職長官具朝服行禮壇在焉關外東西寬

二丈五尺南北長二丈五尺高三尺週圍墻垣東西寬四丈六尺南北長六丈二尺雍正十一年建乾隆

十年知縣馮奕宿捐俸重修

風雲雷雨山川壇

亦以戊日設木主三中風雲左山川右城隍俱南向長官具朝服行禮壇

在城外東南隅東西寬二丈五尺南北長二丈五尺

高三尺週圍墻垣東西寬四丈六尺南北長六丈二

尺乾隆十年知縣
馮奕宿捐俸重修

先農壇

每歲耕藉之日主祭官率所屬朝服祭先農壇禮畢俱更蟒袍補服府城知府秉耒佐貳執

青箱知縣播種州縣正印官秉耒佐貳執青箱播種耕時用耆老一人牽牛農夫二人扶犁九推九返農夫終畝耕畢行謝恩禮其農具俱用赤色牛用黑色箱用青色壇在東關外正殿三間東西配房各一間門樓一間壇基一座東西寬二丈五尺南北長二丈五尺週圍墻垣東西寬五丈南北長十二丈藉田四畝九分石碑一座雍正六年建乾隆十年知縣馮奕宿捐俸重修

關帝廟

雍正三年奉文擇本境廟之大者春秋二仲五月十三致祭牛一羊一豕一追封三代公爵

不用太牢祭器悉照帝廟禮儀照文廟例遵行

雍正六年奉文祭品價銀於本年起運錢糧內動

支銀四十兩廟在西門內大街詳見碑城隍廟祀城

記乾隆十一年知縣馮奕宿捐俸修葺所以捍衛城池故其祭與社稷山川同義或祀於壇或祀於廟其禮則一俱準社稷之例廟在府治西南

正殿五楹東西廊各五楹中門三楹前門三楹東西二角門御製碑亭一座洪武四年知州劉恭獻宣德

元年知州李遂成化七年知州戴斯重修其後殿五楹弘治六年知州倪誥所建土地祠鐘鼓樓牌坊照

壁墻千戶楊奉糾會衆建外道院三所一所在正殿東一所正殿西一所後殿西寢閣三楹天仙廟三楹

圍殿行神知厲壇每歲春清明秋七月望冬十月朔州楊堪建厲壇祭之前三日正官率屬詣城隍廟

發牒文至日設城隍位於壇上設無祀鬼神牒馬神於壇下左右各官常服告祭壇在城北二里許

廟儀與八蜡廟在東門外門樓一座正殿三間週圍牆東西長八丈南北長十二丈

五尺雍正元年建神牌曰先嗇之神曰司嗇之神曰百種之神曰坊之神曰水庸之神曰農之神曰郵

表曠之神曰鄉社壇舊例每里一所凡遇春秋二社日里正率里人祈豐報祀五土

五穀之神祭畢會飲讀誓詞云凡我同里之人各遵守禮法無恃強凌弱務在恭敬神明和睦鄉里以厚

風俗今此祭久廢惟旗纛廟每歲霜降先一日管官土人於各鄉村祭之

揚旌旗鼓吹迎於廟厥明祭如文廟儀廟在舊衛後
闕城盡毀順治初年陳州衛守備劉天福修之

陞去守備魏澤
仍舊建廟三楹
洪福寺
宋仁宗幸此祭告
明洪武置僧會司
劉猛將軍

在東門外八蜡祠內殿一間
乾隆九年知縣許珮瑛捐建
陳胡公祠
按舊志名宦
稱胡公專祠

至今未建乾隆十年知府崔應階知縣馮奕宿卽南
門三元廟改建胡公祠以司城貞子配享每歲捐俸

祭太尉趙公祠
在北門內宋知
州張方平建
孝肅包公祠
在永積
倉內成

化年知州
戴昕建
忠武岳鄂王祠
在太昊陵內三祠原無祭
明萬曆戊戌知州楊堪以

三公有功於陳當血食茲土議以
春秋仲月戊日各用少牢致祭
大王廟
在西門外
康熙四十

六年商人姚承祚李應元重建每
歲九月十七日祭龍神廟祀附內
四賢神
副使翟師
雍以漢汲

公宋范文正公包孝肅公岳忠武
王皆有功於陳命有司春秋祭焉
朱公祠
爲知州朱
祥建在里

甲營南今民私
改爲玄帝廟
洪公祠
爲知州洪蒸建舊在州
西後遷城西一里許
楊公

祠

爲知州楊堪建
與洪公祠隣

康公祠

爲知州康應乾
建在社學北

張公祠

郡人

爲鄉宦張養志建

在城北順城關

孫公祠

爲知州孫芳
建在臨蔡城

李公祠

爲知州李

景雲建

在高橋

先農壇祭文

維年月日某官某致祭於

先農之神曰惟

神肇興稼穡粒我蒸民頌思文之德克配彼天念率育
之功陳常時夏茲當東作咸服先疇洪惟

九五之尊歲舉三推之典恭膺守土敢忘勞民謹奉羹章

聿修祀事惟願五風十雨嘉祥恒沐於

神庥庶幾九穗雙岐上瑞頻書於大有尚饗

社稷壇祭文

維年月日某官某致祭於

社

稷之神曰維

神奠安九土粒食萬邦分五色以表封圻育三農而蕃

稼穡恭承守土肅展明禋時屆仲春敬修祀典九九

松柏鞏磐石於無疆翼翼黍苗佐神倉於不匱尚饗

風雲雷雨山川城隍祭文

維年月日某官某致祭於

風雲雷雨

山川

城隍之神曰維

神贊襄天澤福佑蒼黎佐靈化以流形生成永賴乘氣
機而鼓盪溫肅攸宜磅礴高深長保安貞之吉凭依
鞏固實資捍禦之功幸民裕之殷盈仰

神明之庇護恭修歲祀正值良辰敬潔豆籩祇陳牲幣
尚饗

雩祭祭文

維年月日某官某致祭於

社

稷

先農

山川之神曰恭膺

詔命撫育羣黎仰體

彤廷保赤之誠勤農勸稼俯惟節屋資生之本力穡服田
令甲爰頒肅舉祈年之典惟寅將事用申守土之忱
黍稷惟馨尚冀明昭之受賜來牟率育庶俾豐裕於
蓋藏尚饗

祭祭祭文

維年月日某官某致祭於

城門之神曰

詔命臨民職司守土惟兆人之攸賴並藉

神功奠四序之常調羣蒙福蔭必使雨暘應候爰占物
阜而民安庶其寒燠咸宜共慶時和而歲稔仰靈樞
之默運聿集嘉祥襄元化以流形俾無菑害尚饗

龍神祭文

維年月日某官某致祭於

龍神曰維

神德洋洋寰海澤潤蒼生允襄水土之平經流順軌廣濟

泉源之用膏雨及時績奏安瀾占大川之利涉功資
育物欣庶類之蕃昌仰藉

神庥宜隆報享謹遵祀典式協良辰敬布几筵肅陳牲
幣尚饗

關帝先代三公祭文

維年月日某官某致祭於

關帝之

曾祖光昭公

祖 裕昌公

父 成忠公曰惟

公世澤貽庥靈源積慶德能昌後篤生神武之英善則
歸親宜享尊榮之報列上公之封爵

錫命優隆令三世以肇禮典章明備恭逢諏吉祇事薦馨
尚饗

關帝祭文

維年月日某官某致祭於

忠義神武關聖大帝曰惟

帝浩氣凌霄丹心貫日扶正統而彰信義威震九州完
大節以篤忠貞名高三國

神明如在徧祠宇於寰區靈應不昭薦馨香於歷代屢

徵異績顯佑羣生恭值嘉辰遵行祀典筵陳籩豆几
奠牲醪尚饗

附明洪武二年御製城隍廟文

帝王受天明命行政教於天下必有生聖之瑞受命
之符此天示不言之妙而人見聞所及者也神司淑
慝爲天降祥亦必受天之命所謂明有禮樂幽有鬼
神天理人心其致一也朕君四方雖明智弗類代天
理物之道實切於衷思應天命此神所鑒而簡在於
帝心者君道之大惟典神天有其舉之承事惟謹陳
州城隍聰明正直聖不可知固有超於高城深池之

表者世之崇於神者則然神受於天者蓋不可知也
茲以臨御之初與天下更始凡城隍之神皆新其命
睠茲州城靈祇攸主宜封曰鑒察司民城隍靈佑侯
靈則隨感而通祐則揚善以福此固神之德亦天之
命也司於我民鑒於州政享茲典祀悠久無疆王者
施行

太康縣

社稷壇

在西關迤北

風雲雷雨山川壇

在南關石橋外迤東

先農壇

雍正

四年知縣張對墀奉文建地基四畝九分在東關外

關帝廟

知縣蘇楫汝張信捐俸新建

城隍廟

在治南明隆慶二年五月廟災三年春邑人重

建明季寇毀

國朝順治五年知縣田

八蜡廟

在東關

六善重建康熙

十六年知縣張信重修

八蜡廟

在東關

邑厲壇

在縣北

劉猛將軍

原在八蜡廟內乾隆三年知縣李綸捐俸建正宇三間後

奉廟

龍王廟

在西關內路北雍正八年劉輝祖奉文捐修

二賢祠

以下六祠俱春

秋致祭舊在縣東乾隆十年知縣宋士莊捐俸於書院旁建祠三楹迎主祀之

王公祠

顧

公祠

蕭公祠

乾隆十年知縣宋士莊捐俸葺舊二賢祠改蕭公祠迎主祭之

楊公

祠

在化民臺東南隅

韓烈士祠

列女祠

扶溝縣

魁稷壇

明洪武二年建於北郊成化中圯於水知縣胡宜改置西北近郊

風雲雷雨山

川城隍壇

在縣城南明洪武三年建

先農壇

在城東南隅藉田四畝九分

關帝廟

在南街

邑厲壇

舊在北郭圯于水改置城西北隅

八蜡祠

在東門內城

隍廟

元至正間工部差官潘忠濟修建燬於兵明洪武三年縣丞劉益創建正統中知縣韓璟重修

成化中知縣胡宣買廟後民地六畝以廣其制魏峩宏敞視他邑殊勝民間四時報賽於元夕及三月二十八日尤甚神亦特著靈異隣邑走謁如市崇禎十五年燬於左兵

國朝順治八年鳩工重建大殿黃冠張上翼力肩其

程明道祠 元時建文廟西廡南燬於兵明景泰中知縣陳

紀移建縣衙內築化民臺嘉靖丙午知縣陳輅建南街西巷設大庭塑像以游揚二賢配復築化民臺崇

禎中知縣陳莊重修亂後寢廢 國朝順治十一年署縣事訓導張一麟邑孝廉何際美始築墻垣修飭

前宇康熙八年知 穎考叔祠 在南郭外傳聞明丞樂縣高錫爵重建 中見婁於上因命有司

立祠祀之 國朝順治十 保障二勳祠 在文廟西祀三年教諭陸鍾呂重修 前令王公廷

華孝廉何公岑邑前朝兩遭兵亂賴以 馮公祠 公諱保全士民思之申請建祠春秋致祭 盛明

號月禎涿人有善政邑人建祠 歐左祠 歐陽公諱照祀之 國朝順治十五年重修 湖廣竹溪人

左公諱史陝西耀州人俱有善政邑人建祠合祀門額上有石勒清風萬古四字

趙公祠諱如桓字廷一重隸宛平人有善政邑人建祠

西華縣

商高宗廟

春秋二仲上甲日祭 商箕子廟 春秋二仲上丁日祭

社稷壇

在縣西關 風雲雷雨山川壇 在縣南關 先農壇 在東關外

遵奉建置

關帝廟

舊建城內揚善寺山門右雍正十一年知縣劉焜捐建三楹於殿後 城隍廟 在縣治東

北明洪武三年主簿李興旺即廢址建天順七年知縣蘇綸重修弘治四年知縣翁積德義官張瑄鄉耆

田景馬良增建正德五年主簿高忠社民劉彥名程式修萬歷十年街民吳鸞重修二十八年知縣胡蓮

鄉宦王錫民監生李大經 邑厲壇 在縣北關 旗纛 八蜡

廟 在先農壇東乾隆
三年知縣劉焜建 明忠義祠 正德時殉難知縣李
景教諭孔環典史楊

紹龍春秋二
仲上丁日祭

商水縣

社稷壇

城西南隅

風雲雷雨山川壇

東

先農壇

郭外東南隅 雍正四年建

關帝廟

在城內南街

城隍廟

在城內西街路北

邑厲壇

北郭外

八蜡廟

劉猛將軍祠附

舊在城東郭外一里許今改置城北

炎帝祠

正月初三 七日祭

皇廟

衙神廟

獄神廟

馬神廟

俱每歲春秋仲 月上戊日致祭

項城縣

社稷壇

在西門外

風雲雷雨山川壇

在南關外

先農壇

在城東 雍正四年奉

文建 耕田 四畝九分

關帝廟

縣內西

城隍廟

在北街宋廣濟院遺址宣德間

修後年久垣地被侵知縣魏復復地構亭更衣廟右置室居守者康熙二十八年知縣顧芳宗捐俸重修

工部虞衡司員外撫甯張霖監生山

八蜡祠

舊在縣

陰王欽誥修歲久全廢

國朝順治十七年知縣黃

陸改建草祠三間於大吉寺西旋圮康熙二十六年

六月內飛蝗蔽天知縣顧芳宗率士民竭誠步禱旋

卽消散並未食禾隨剏建瓦祠三間於舊址設木主

八座每歲遵祀典致祭嗣後他境屢有蝗災獨不入

項境僉以爲誠之所格云雍正二年奉文劉猛將

軍配

馬神廟

舊廟在縣治西知縣王欽誥修後

圮知縣張應弘重修於北門內

厲壇

在城

光武廟

一在南頓城始建無考宋項縣令江淳

春重修嘉靖元年商人汪恪捐貲二千兩增修又捐

銀六十兩置地六十五畝以供焚修知縣何廷俊申

請春秋致祭明季傾圮國朝康熙二十八年知縣

地本縣正明四至仍以汪氏主之一在縣西北忠

義塚明萬曆二十四年知縣王欽誥增修康熙二十

二年知縣顧芳宗捐俸重傅公祠在城內文昌閣後

修祭器與南顧廟祀同乾隆八年知縣錢

國寶賈令祠在舊縣城東項令達以德化民後人思

捐建之立祠今圯按賈達未嘗為項令詳

傳楊烈婦祠在舊縣城西唐縣令李侃妻邑人廟祀

之明隆慶元年知縣魏勳以舊祠去縣

遠徙建戚公祠縣北關街西知縣戚竟有魏公祠

治西關外善政百姓思之立祠今廢

縣北關街東知縣勳有德魏楊徐三公祠知縣魏公

政士民思之立祠今廢雲中楊公

新期徐公可大俱有善政民四賢尹祠在文昌閣後

德之共立祠在魁樓西今廢知縣田唯嘉

有善政民立祠知縣顧芳宗善政多端士民重建祠

合祀焉後知縣劉其時高思雍邑人肖像並附祠內

沈邱縣

社稷壇在縣治西門外風雲雷雨山川壇在縣治南門外先農壇在城東門

外藉田四

畝九分

關帝廟

在宛邱寺西康熙二十四年邑令郭金壁創建雍正七年復於大殿迤東建啟聖祠三間

帝三城隍廟

在縣治東南隅知縣李琳淑建嘉靖八代年縣丞吳芳重修萬歷五年知縣司成

章建鐘樓二十一年知縣劉世光重修康熙十六年

闕邑捐置香火田六十畝監生孫遜敏施地四十畝俱在縣東

距城五里呂厲壇在縣治北門外里社明洪武定制每里立春秋仲月用羊豕酒果致鄉厲明洪武定制每里立無祀

祭祭畢享餽懽飲鄉厲鬼神壇命耆老歲以春秋仲月用羊豕致祭今里社土地祠在縣治八蜡祠在

鄉厲俱廢止存邑厲壇土地祠大門內

外馬神廟在縣治北隅獄神廟在岡園內每歲春秋宋公祠在縣門東隅六公祠在縣頭門外西南隅舊稱五

齊劉世光南邦化黎玉田五公邑令諸齊賢捐資建入劉允謙號六公祠蓋羅馬劉三公舊祀毀合祀於

東川府志 卷之九 祀典

此戴公祠在槐坊店集康熙二十一年邑人爲邑侯戴良佐建三公生祠在北關關

門外爲劉公謙諸公齊賢王公郁文建

陳州府志卷之十

楚鄂崔應階吉升氏纂修

古蹟

陳爲古名區義農以後類多哲王名宦高人韻士往來居處於其間然代傳旣渺兵燹相尋懿軌芳踪若隱若見官斯土者非好古深思之士爲之搜羅散失勒成一書安在墜緒之茫茫不僅存千百於付一乎志古蹟

巡幸

漢高祖五年冬十月王追楚王籍至固陵

漢紀王追項羽至陽夏南

此足證固陵在宛郢西北而非固始矣

六年帝會諸侯于陳執楚王信

以歸

今西門曰平信以此

光武十有九年秋九月壬申帝行幸南頓縣舍置酒會

賜吏民復南頓田租一歲因父老請復增一歲進幸

淮陽

章帝八年冬十二月甲午帝東巡狩由陳留梁國至於

淮陽

周世宗顯德三年正月丁未周主至陳州宴從官於行

宮

宋仁宗明道

二年帝幸洪福寺

通鑑云在開封府陳州按仁宗生母宸妃李氏

薨劉后欲以宮人禮治喪于外呂夷簡力言不可以
宸妃誕育聖躬而喪不成禮樂日有受其罪者于是
以后禮殮用水銀殯洪福寺荆王元儼爲帝言陛下
乃李宸妃所生妃死以非命帝始知爲宸妃子因號
勸累日下詔自責追尊諡曰莊懿皇太后幸洪福寺
祭告易梓宮親啟視之妃以水銀故玉色如生冠服
如皇后帝嘆曰人言其
可信哉待劉氏加厚

明太祖洪武元年駕幸汴梁駐蹕於陳

藩封

周陳侯

媯姓舜後初封虞箕伯直柄中衰湯始封遂於
陳至周武王虞幕裔孫闕父爲周陶正能利器

用王賴之且與其神明之後以元女大姬下嫁其子
滿而封諸陳是爲胡公使奉虞祀與杞宋並備三恪

胡公卒子申公犀立申公卒弟相公臯羊立相公卒

季申公子哭是爲孝公孝公卒子慎公國戎立慎公

卒子幽公寧立幽公卒子釐公孝立釐公卒子武公

靈立武公卒子夷公說立夷公卒弟平公燮立平公

卒子文公圍立文公卒子桓公鮑立桓公卒弟佗殺其太子免而自立蔡人殺陳佗桓公之次子躍立是

為厲公厲公立五月卒弟莊公林立莊公卒弟宣公杵臼立宣公卒子穆公欵立穆公卒子共公朔立共

公卒子靈公平國立靈公為夏徵舒所弑楚殺徵舒乃迎立公子午是為成公成公卒子哀公弱立哀公

之弟招殺公子偃師而立其嬖子留為世子哀公憂患自殺楚滅陳棄疾復封之立偃師之子吳是為惠

公惠公卒子懷公柳立懷公卒子閔公項子或云姬越立史記作潛公楚滅陳殺閔公陳亡項子姓始封

未詳即今頓子偃姓始封未詳後附於陳而南徙謂項城縣之南頓魯宣公時欲事晉背楚而絕

陳好楚遂滅之今項城有南頓城即其地沈子姬姓文王子昭季始封吳楚戰雞父沈子郢死焉敬

王十四年晉合諸侯之師於召陵為蔡侵楚沈子不會齊怒使蔡公孫姓帥師滅沈以沈子嘉歸殺之今

沈邱縣即其地赧王三十有七年楚徙都陳秦白起伐楚拔

王遂徙于陳王蒙太子熊元代立是為考烈王與諸侯伐秦不利而東徙壽春

考烈王與諸侯伐秦不利而東徙壽春

郢燒夷陵頃襄

漢 淮陽王友

高帝子十一年封惠帝元年呂后改為趙王呂氏元年立所名孝惠子疆為淮陽王

疆卒以壺關侯武為淮陽王亦所名惠帝子年少未之國居長安

淮陽王武

文帝子三年自

代徙封十一年徙為梁王

淮陽王餘

景帝子立三年徙為魯王

淮陽憲王欽

宣帝

子元康三年封傳至漢王新莽時絕

穎陰侯灌嬰

高帝時以功封其地在今平信鄉長

平烈侯衛青

以功封傳子伉坐巫蠱國除長平漢縣後省入西華

長平節侯彭

宣

以三公封傳子聖孫業王莽時國除

平周亭侯丁滿

哀帝舅建平三年封今扶溝小

扶城即其地

扶鄉侯普楚

元始四年封今扶溝大扶城即其地

東漢 淮陽王元

漢宗室初為更始將軍立為帝光武即位詔封為王後降于赤眉為所殺

陽王延

光武子十五年封為淮陽公十七年進爵為王明帝永平十六年徙封阜陵王

淮陽

項王昞

明帝子建初四年自常山徙封十六年卒章和二年和帝立其子側復為常山王

陳

敬王羨

明帝子肅宗章和二年遺詔自西平徙封傳思王均懷王竦絕永寧元年復封敬王子安

壽亭侯崇是為陳項王傳孝王承愍王寵為袁術所殺

扶城侯子恭

陳敬王孫順帝永建

二年

扶樂鄉侯劉隆

以佐光武中興功封地屬太康後改封長平侯又改封慎侯

陽夏節侯馮異

光武中興累立顯功圖形雲臺陽夏今太康縣

西華惠侯鄧

晨

以佐光武中興功封

扶溝侯朱鮪

更始左司馬守洛不下光武使岑彭說降拜平狄將

軍封

鯽陽侯陰慶

光武時封地在沈邱

濇強侯陰博

光烈皇后姓永平初

封濇強今商水是也

新汲侯馬光

建初四年封新汲漢縣後省入扶溝

西華侯鄧

閻

和熹皇后弟后崩為中黃門所譖殺之

西華侯鄧忠

和熹皇后姪不道國除南

頓侯鄧演

和帝鄧后兄建和二年封

魏陳王邕

黃初二年自淮南徙封六年改封邯鄲

陳思王植

太和六年自東阿王徙封

傳子志徙封濟北王海陽貞侯郭嘉以討譚尙功封洧陽亭侯地在扶溝

晉南頓王宗

汝南王亮子以討劉喬功封坐罪死

陳王斌

咸甯四年徙爲西河王

淮

陽公騰

穆帝子永和七年封

陽夏戴侯滕舍

以討蘇峻功封

陽夏男謝

絳

南北朝宋西華文宣子劉穆之

武帝時以平桓立功封

魏淮陽王

尉元

獻文時封子翊嗣

淮陽公皮豹

太武時封子承宗嗣

陳郡公李叔

仁

以駁功積封

後周陳王純

文帝子建德三年後爲楊堅所害諡曰惑

隋陳懿公竇榮定

傳子密公抗仕唐卒子衍襲

平輿侯皇甫無逸

以

死漢王難封

唐淮陽王道元

高祖兄子武德初封後討劉黑闥戰死傳道明坐罪免

陳王忠

貞觀

二十一年以皇孫封高宗舊志名珪開元陳王

成美敬宗子文宗開成二年封四年立陳郡公殷開

山以破衛文淮陽郡公袁滋

宋陳王元祐太平興國八年自廣平郡王陳良僖公仲

邵宗室宗望子官至陳州觀察使卒子士闢嗣因護

陳王神宗子初封申王徽宗即位加太傅徙封陳

明項城恭和王子堰 沈邱榮 戾王同發薨子靖和王

榮定王睦栲嗣太康王載堉 陽夏王載堊

勝蹟

淮甯縣

潁陰故城

在郡西南平信鄉卽漢潁陰郡高帝封灌嬰於此出通志臨蔡城城東北二

十里漢光武與王莽相距築城臨蔡河故名隋分宛邱置臨蔡縣

新平故城

一統志新平縣

在陳州東北漢置縣屬淮陽國

長平故城

在城西北七十里西華縣東北漢置縣屬淮陽國

武平故城

在城東北七十里鹿邑縣境漢置縣屬淮陽國

古糧城

在城北一里許蔡河

濱門上有樓繞以周垣舊以貯糧今建關王廟

方城

在城東南四里始築無考以

城制方

夏亭城

寰宇志陳州南頓縣西南三十里有夏亭城城北五里有株林非西華東

西兩夏亭也

畫卦臺

路史註云今宛邱城北一里有伏羲廟八卦壇寰宇志云伏羲於蔡水得

龜因畫八卦之壇有長史張齊賢文李邕易之一統志有撰著壇卽此處明正統三年知州張志道增築

建亭垣周十三門石刻一座嘉靖二十四年知州唐方鼎建大殿七間石刻四座東西廂各三間門一座

嘉靖丙辰知州李應霖修之立坊于西扁曰觀察遺址萬曆初知州洪蒸增捲棚五間八角亭一座內塑

伏羲像知州許汝升繼立坊於舊處扁曰則圖古蹟
今廢止存墓康熙八年知州方于光重修大庭三楹
二十八年知州王清彥絃歌臺舊名厄臺在城外西
修整補葺殿宇重新南隅世傳爲孔子絕
糧處明成化六年知州戴昕闢其基址建以廟庭繞
以周垣中設尼父木牌拜謁以石記之名曰厄臺祠
弘治七年知州倪誥重建塑聖像於中左右列四科
之賢嘉靖七年巡按御史譚公纘增拓祠宇題曰絕
糧祠扁後堂曰知德書院二十一年巡按御史趙繼
本改曰絃歌臺其廟則正殿七間門兩座皆高臺危
壁巍然可仰萬歷二十九年徐公卽登復建講堂數
楹榜曰仰止軒更其堂扁曰崇正書院增其門曰美
富之門每夕陽晚眺古栢蒼然蒲荷爭碧偉然一奇
觀也康熙三年設奉祀生一人看守康熙二十一年
知州蕭國弼重修殿宇繪飾聖人暨十哲諸賢神像
二十九年知州王清彥重修廟貌補葺堵垣除其荆
棘樹以松栢餘詳聖蹟通志家語孔子自衛
又有桑落註孔子絕糧於此陵陽臺之陳陳侯起陵
陽之臺今秋胡臺在州城東南六十里俗傳秋胡仕
臺不存陳時居此秋胡魯人故名臺曰魯

臺
弩臺

太平寰宇記有陳敬王弩臺後王寵善弩射黃巾賊起寵有弩數千張出軍都亭人素聞

王善射不敢叛百姓歸之

開元中移孔子廟於其上
藕臺
城西北三十里舊地以爲卽古固陵之地

括地志云固陵在沈邱縣西北十二里一統志云固陵在陳州城西北三十里謂之固陵近似但不知何

以名曰藕臺且其地有鳴

馬臺亦未詳其名臺之義
貯糧臺
在州城五里俗呼平糧塚其高二丈

其大頃餘有四門林木
石牛臺
在城東二十里舊志變然未詳何代所築昔有人發此得石牛

一遂止
讀書臺
在州西北隅柳湖宋蘇轍爲教授時因名之讀書之所成化六年知州戴斯因構

亭于上立碑識之後屢加修葺往往仕客遊賞稱其勝境康熙八年知州方于光修整勒石九年知州劉

汝壇又重修之扁曰頴濱亭二十九年知州梳洗臺在州王清彥補築臺基重修亭宇煥然改觀梳洗臺在

城北二里宋狄青判陳時築上建以樓時遊憇焉今爲重武廟石攔翠瓦掩映林間亦一勝觀也望

湖臺
一統志在陳州之西圍宋知陳州張詠常有詩云昨日憑高向西望滿川烟樹雨濛濛范鎮詩

云臺上望城下迢遙知幾尋湖光
陰隱見多礙柳烟深今臺不存
孝義臺在州城南十里紫

荆臺在州城南 駐蹕亭在城北蔡河之濱洪武元年

正統間黃河水溢 防亭博物志云邛地在陳縣北防

也 辰亭國名紀郟古國宛邱 義神實路史註云今宛

國傳云太昊之墟神農亦居此酈元云今城北有所

謂義神實者其處也世紀云太昊都豫州之域西望

外方東不及孟諸胡公之封神農亦都 五穀營在城

之是義炎果同處矣義神實未詳其處 五穀營在城

里相傳神農 焦夷郡東明化鄉周襄王十五 瓦關城

種五穀處 焦夷年楚伐陳取焦夷即此 瓦關城

二十里通志以為春秋時陳 龍王關城城西 水關城西

侯與頓子國相鄰立此為界 龍王關城城西 水關城西

關舊志以為皆 卧治閣在治西漢太守汲黯 白龜池南三

頃襄王所立 卧治閣所建今閣廢址存 白龜池南三

在城北一里畫卦臺前世傳伏羲 柳湖城西北隅宋

於蔡水得白龜鑿此池以養之 柳湖蘇軾兄弟讀

書東門池按水經注陳城故陳國也東門內有池

而不耗竭不生魚草水中有古臺處磨碓寨在城東昔黃巢圍城久四

頓墻塹間賊俘以食日數千人至為春磨寨列巨西

磨數百生納人于日碎之合骨而食又名搗磨寨

園在城西宋知州張詠創中有北亭曰流芳中燕流

殊以故相守此于隙地有莎叢生殊何莊村在城南

愛護之為莎場既成作庭莎記今廢

休居東橋閘在城東蔡河內綉尾閘在城南蔡河神農井在

此註云淮陽多古蹟有鳴井在城東南三里以義井在

神農井今失其處

聖祖南巡賜以詩綾扇各一因構樓以奉之雍正戊申園中

元子名傑令陽穀

門外明成化六年指揮李覲

鑿二井以蘇暑月行人之渴

逸園在城西北羈邑人

三有亭九隙地作石山潺湲洞水古木參差稱淮郡

第一名園相傳即宋守張詠之西園云康熙壬午應

涇靈芝九本
稱瑞異云

古陳八景

太昊遺墟 白龜靈池 卦臺秋月 胡公鐵墓

絃歌西照 思陵暮靄 古宛晴煙 柳湖春曉

右所稱八景皆此中古蹟之最著者非有點綴粧飾以炫觀而已用是布景允冠中州往代碑碣如義陵卦臺絃歌諸勝當有存者乃今湮不可攷惜哉余獨於古宛晴烟有異焉秋冬之交餘暉薄暮風恬籟靜月朗星輝遠望之淑氣盈城近挹之清氛滿日半天宿霧浮九陌以氤氳一抹寒煙凝四隅而縹緲甃山川所苞孕何青紫之交呈可謂絕勝嵐光而夏殊曙色者也

宛邱八景

詳圖志

義陵嶽峙 蒼草春榮 絃歌夜讀 蘇亭蓮舫

蔡池秋月 卧閣清風 望臺烟雨 柳湖漁唱

張說隆興寺碑 李邕畫卦臺碑 流盃亭碑陰記

趙毅書光化中立 趙太尉祠堂記 以上四記出河南通志今俱不存

太康縣

扶樂城 西北四十五里漢置郡 漢王城 料城 北四十五里相傳光武積料處

南會城 北會城 朗城 西北三十五里 坊城 西北二十五里 小扶

樂城 西三十里舊置縣 小郭城 西北三十里 五子臺 縣西高陵鄉太康盤遊五

子御母以從處上有五子廟旁有五子澤後廢 漢王城 霸王臺 俱在縣西北五里楚

漢相距 南距臺 北距臺 俱在縣南二十里相去一里許即漢王追項羽至陽

夏相拒處 募城募臺 相傳光武募軍處在城東 平臺 姑羊臺 萼臺

西北三十里武后
遊幸築臺賞花處
鳳鳴臺南六里
谷陽臺西三十里

八景

歌臺流響 靈塔晴光 花萼春榮 長山積翠

蓮池夜月 霸壘斜陽 渦水秋瀾 宋岡紅葉

扶溝縣

扶溝故縣即穀平鄉縣東北新汲故縣即汲鄉一名

仍有堂上堂下桐邱即天井陵其南下有大扶城即

之名今離下是鄉縣東二十里今相子岡 扶亭東漢建武初封朱鮪

是也即漁村烟雨之處又建小扶白鄉今白亭城縣北四十里陳留風俗傳

亭于署中 純孝鄉春秋時鄉名在城南三里安樂鄉唐鄉名在

今潁考叔祠疑即其地

寺臺保

太平鄉

宋鄉名在孟亭保外有平周亭即小扶城今小扶城疑在太康境又有匡城鄉據水經似

在護陂之南考太康縣治係舊匡城北古城許雙泊此兩地俱非境內舊志載之恐誤

岸上舊志曹操與袁術相拒築城屯兵未詳許昌故縣 西南三十五里城址俱存見水經

固寺城

北十五里城址宛然洧陽城在縣南練寺保魏封郭嘉於此其後嚴氏世居又名

嚴泰南營 在練寺保相傳曹操屯兵處漢王倒井 在廟頭岡俗傳光武行軍至此

士渴甚倒井飲平原社 在縣南不詳其地大洙河 東南二十里元至正

間為鏹後白鶴觀 在城東南隅舊名瑞雲宮宋天聖道士王志明乘白鶴上仙因以名

觀紅花局 在天寧寺後元置紅花提舉司辛氏世其官澗河堤 在龍泉觀東突元如

阜漕運倉 在城隍廟東舊多松栢今廢

八景

東川府志 卷之十一 古蹟

扶臺晚照

即明道化民臺在縣衙西

艮嶽晴雲

在東門內嶽廟左方圍百餘步高三

丈上有神祠一二

翠屏春晚

土山在儒學前與南城連古柏蒼虬可愛上建魁星樓

泊

冰夜月

北郭外溱洧合流波清月晃灑影澄徹

桐邱宿霧

邑西古桐邱水經註所謂

天井陵一名烟霧山

寶刹飛嵐

邑西南屈闔舊有寺今廢梵刹巋然獨存晴嵐如織

漁村

煙雨

邑東蔡水濱名稱大扶城其地有羅夫人祠

漢井溢泉

舊稱苗社倒井今更定之

俗傳為光武飲軍處

西華縣

女媧城

在縣西北十里曹植贊曰古之國君造篁作笙人物未就軒轅纂成或云二皇人首蛇身

形化七十何德之靈史女媧氏起于承筐之山都於中皇之山葬於風陵則此或所築之城而非其所都

池衍疇亭

在縣城內西北隅澤中萬歷二十一年巡撫吳自新委西華縣建以祀箕子頽廢已

久康鳳二十九年知縣李培捐貲重修辰亭春秋宣十一年楚子陳侯鄭伯盟於辰陵卽此箕

子臺

舊有洪範堂在學宮後舊傳箕子諫紂不聽出於此後人築臺以祀縣志云箕子名胥餘紂之

叔父封於箕非囚於箕武王克商命召公釋箕子之囚於夏臺非西華也按書傳及史記召公釋箕子

俱未言其地箕國在商圻內亦未詳其處春秋晉敗狄於箕又一地在山西榆社縣東南三十里箕子名

他書不載惟司馬彪註莊子有之夏亭城縣西三十里春秋陳大夫夏御叔封邑長平

城縣東北十八里漢時有長平縣卽此北柳城在縣西北十里南柳城在縣南三十里

魏史正始二年魏欲廣田於揚豫之間爲伐吳計鄧艾以爲陳蔡之間上下良田可令淮北屯二萬人淮

南屯三萬人且田且守計除衆費歲獲五百萬斛太傅懿善之時柳舒爲陂長因以爲名奪母城

在縣西七十里相傳昔有護當城在縣西十里鄧艾二子爭養其母因以爲名所以護守營田也

習陽城在縣西南十里卽漢習陽城故地今俗以其地有石羊二遂訛名石羊失其舊矣梁

孝湖

在縣北三十里鄧家營傍周廣五六里故老相傳舊名梁孝湖今俗訛梁簫窪漢書梁孝王築

東苑方三百里廣睢陽城七十里大治宮觀臺榭陂池勢侔皇居今以道里考之湖去睢僅百里其為梁

孝王東苑故蹟無疑固陵錢廷文博雅士也曾為余

言考覈極確云以上續縣志按睢陽乃今歸德府

商邱非睢州也睢州在漢為襄邑金始改睢州東苑

之地在今開封歸德等處苑圍雖大不能越其境因

西華漢時屬汝南郡境土邈涼馬臺在北柳城之西

不相屬安得為東苑故蹟乎亦鄧艾築其廣

數十畝高五六尺通志又云陳靈公築今已浮牙清

地微隆起耳續縣志亦以為東苑故蹟今仍舊志

水縣 卽小窩鎮也其創革都城在縣西鹿城在縣西

里邑人馬魴作西華志未及半遇劉六七亂未得成

書颺猶見遺稿云陸城乃栗陸氏故都考証甚詳今

亡之矣姑鄧城縣城北三國魏安西柴城在縣西四

存其說鄧城將軍鄧艾屯兵處柴城十里周世

宗建舊志云昔人于小關口鎮在縣西北前代嘗立

寔燒造積薪於此故名關口鎮巡檢司其創革亦不

可黑軍寨

在關口鎮之西元

務官臺

在縣西南九十里前代稅務官

所居丁蘭宅

在縣東北三十里蘭河內人寄居於此通志有丁蘭臺俗傳刻木爲母築臺祀

之柯家橡林

在縣東一里何宰相別業林木森鬱成化初猶存其蹟今廢何宰相名曾晉武

帝時人嘗侍晏退謂諸子曰主上開創大業未聞經國遠圖非貽厥孫謀之道及身而已後嗣其殆乎又

豪奢過度一食萬錢猶云無下箸處元嘉之末何氏無遺種

塔兒灣

在縣南關舊名法勝寺成

廢

八景

倦洞靈湫

龍溝瑞氣

桃園春色

虎窩晴煙

柳湖碧波

宣橋返照

崑邱夜月

空街玉聲

商水縣

按商水所載如范蠡湖乃在今嘉興府高祖斬蛇溝在今豐縣蘇后棄兒尤俚俗所談姑存其

舊蓋不欲廢
邑之勝境耳

鳳凰臺

在城南十字街相傳臺畔有梧桐
漢宣帝時黃霸守潁川風棲於此
駐蹕樹南

東嶽廟銀杏一株初尚小明太祖車駕幸汴駐蹕樹
下後忽暢茂復異衆木下有足跡深寸許至今不泯

章華臺

城北二里許春秋襄公十七年楚靈王成章
華欲得諸侯以落之使蓬啓疆召魯侯即此

或云臺在今華容縣有細腰宮此
蓋小章華通志云頃襄王所築
扶蘇城城南十二里陳涉起

兵自稱扶蘇故有此城隋越王
鄧城縣西北四十里
側於此置扶蘇縣唐武德時廢
魏鄧艾屯兵於

鍾鎗倉

縣西南三十里魏鍾會屯兵處明初以
縣治西南遠設倉屯收秋糧今廢
焦

寨

縣西南四十五里宋
范臺縣西南十五里俗傳范
將焦光贊屯兵處
蓋既與勾踐謀滅吳乃

挾其珍寶與西子泛舟歸湖即此至今臺之
北地窪下每遇霪潦波光萬頃宛然湖云
城頭縣

三十里蘇子由居陳州子瞻往視止
宿於此相傳每夜靜常聞吟誦聲
白帝臺縣西北三十里

俗傳高祖斬白蛇處四季風常清涼

棄於互鄉俗名固牆縣東南四十里本項城縣轄舊志訛為商水大王莊真武護法

玉靈官故里相傳火燒橋舊有七十二空白玉欄杆今廢張公釣臺城西二十五里魏家橋西

有碑陳半臺城西五里牛頭寨城西三齊會臺在南陵

蓮臺巴村東叢臺城北二十里沙河之陽楚靈王因築章華併築此以像華容之地通

志亦云頃襄王築水灌臺城東北二十里今屬淮寧霧臺城南十里梧觀臺

城西六北湖城北十里驛馬溝縣西南十里相傳孫叔敖所鑿湍急如馬因各

時曲縣南五十里激水於此洄曲故名唐元和十年李光顏敗淮兵於時曲即此南湖城南

十二乾谿臺城北二里春秋楚靈王築此為游觀之所崇臺城北二

八景

銀杏蟠龍

城南東嶽廟有銀杏一株枯乾不朽不知何時植也相傳明太祖北征駐蹕樹不足

跡深寸許至今不磨或訛為光武非是

烏溝夜月

烏溝河在縣治東北八里許村屋稠密雲

獨參差月夜遊此清幽如畫或曰光武常黑夜尋馬至此迷不識路俄而天大明朗如月光然土人立廟

祀之謂之曰失馬廟今其遺址尚存未知然否

白帝清風

白帝臺縣治西北三十里相傳即漢

高帝斬白蛇處至今四季風常清涼

梧桐棲鳳

鳳凰臺在城內十字街漢黃霸為潁川守鳳棲

於焦砦晴烟

焦砦寺縣治西南五十里宋將焦贇屯兵處林木蒼鬱雖天氣晴明常如烟雲

繞澱渡秋遊

縣治東門外石橋處即古澱水常於秋月鼓棹中流荷香襲裾沙鷗翔集爽氣

迎人極清曠之雅致

荒城夕照

城西有楚懷王墓及張輅墓高塚如山雉堞遙映返照東窺草

樹離離殊足豁人心目

章華遺址

章華臺城北二里許春秋襄公十七年楚靈王築章華臺

宮諸侯以落之使太宰蓬啟疆來召魯侯即此或曰章華在今華容縣此蓋小章華云

項城縣

南頓城

在縣北五十里春秋時頓迫於陳南徙故曰南頓漢光武父劉欽為南頓令即此及帝即

位於建武十九年幸南陽進幸南頓項城在槐坊店縣舍置酒大會復南頓二年出租項羽所築

公路城

袁術所築光武臺北五十里南頓城瞻星

臺

在南頓城東北高阜上光武被王莽兵追逼投匿其中隨有蜘蛛網

其上因

大郎閣在南頓城內漢後主延熙八年魏揚州刺史文欽與都督毋邱儉起兵討

司馬師渡淮

至項司馬師與監軍王基據南頓時有太邸閣閣內有糧儉等往爭弗克死之遺址尚存

德勝城

縣西三十里唐晉王柳鎮縣城晉王臺在縣西

十里與德勝城相近上有古井四門空洞秦邱縣西

乃唐李克用屯兵之所古廟碑刻猶存十里苻堅將兵南侵駐此先邱頭司馬宣王兵次邱是童謠云堅不過項果然

東... 卷之... 古蹟

即蓮池渡城東五里

八景

柳鎮春翠

星臺風清

古城槐陰

仙塚草色

靈祠夜月

糧閣曉鍾

長虹映霞

頓邱烟市

沈邱縣

醒城

縣西四里湖迷路

至此醒覺因築城以自衛名曰醒城

鯛陽城

縣南三十五里

鯛水北與地志沈子國西有

戚里

陰慶爲

黃城縣東二十八里舒陽河南相傳前

沈子國城

東南三十里卽周聃季所封

沈亭

縣東南

國城東五里

秦高士沈郢建爲

勤農亭

縣東

乳香臺

縣南二里許上有界首關東北五十里畢卓池西南

香臺寺昔產乳香舊有巡檢司五里鰲陽城內相傳為畢蓮池縣西北三十里明正

卓飲處廣十里今已半湮統間黃河流徙此地出蓮故名今半潭在縣南關南浦在縣南

八景

香臺夕照在縣南二里上有香臺寺基址高孤柳寒

鴉孤柳古所植也在治北材幹植東郊牧唱在城東

廣民稠羣集芻牧兒童南浦漁歌在縣南河中每遇

橫坐牛背唱樂以歸水漲漁舟雜集夕

棹以醒城烟柳在縣正西七里城高爽週圍皆鞠道

垂楊在縣西關外抵鞠家集垂楊半潭新月在縣南

有深潭新月中天愛七里廻灣在縣西北河灣環繞七

水光蕩漾可愛古蹟

可玩

陵墓

淮寧縣

周陳胡公墓

舊志謂在城南世傳其墓用鐵冶鑄成苔色蒼古在壕內今人謂在城西北角臺下

漢車騎都尉馮

唐墓

城東南四十里太守汲黯墓東南十里鹿邑縣境朱

買臣墓

南十八里按本傳朱買臣與陳不干涉梁元帝時將有朱買臣不知是其墓否

唐太尉趙儼墓

城東北弟昶羽并附

石晉刺史陸思鐸墓

城東北

宋狄武襄公青墓

城西北柳湖濱

龍圖閣直學士段少連墓

城西

卽段家冢

知陳州張詠墓

宛邱縣孝悌鄉謝村古孝悌紳在城西今爲平信鄉

明侍御孟鏞墓

城西

方伯王良臣墓

城西

都御史張養

志墓

城東北萬歷

董烈婦墓

城西北官

魏烈婦墓

城西

北

思陵冢

城南三里凡四楹去數十步高廣無異或踐

傳者或因植既王陳思陵又意義相近遂附會之耳

黃土冢

城南大堤內或作黃頭冢以唐斬黃巢傳首

多於此冢取黃土泥

平糴冢

東南三里許 雙冢 有三處一

十二里二冢相連高六七丈一在城西高丈餘止一

冢不知何以名為雙冢或謂春秋時陳女厲嬀適衛

莊公厲嬀生孝伯早死戴嬀生桓公嬀人生州吁莊

冢

在州城南

試劍冢

在州東南

黃連冢

在州城南十

連故名或以為黃霸墓者非
王禪冢 在城東南三十五里
五里堤冢 在城南五里高

時如門闕愚以古陳州城周三十里此或是昔南城耳其近處有冢高卑大小不同不可計數多有漸同

平地者或古宮城基址也
九女冢 在城南二十餘里陳地之冢惟此頗有布置中一冢大十數畝

高五六丈少前冢頗小土人謂之香亭以為慕焚香處也左二冢右二冢各相去數十步兩兩相對其東

西又各一冢西冢亦二冢相連東冢後五冢相連其高大次于大家五冢後又連二冢其形畧小蓋中

為王墓左右皆其貴臣後七乃其妃御也
方冢 在九女冢東南形如覆斗
胡家冢 與方

近泥河店冢在城東南二十里店前後俱有
范家家 在泥河南數里
方城屯

冢在范家連冢在城西南五十里
魯臺三冢 在魯臺集東北
毛冢 在

北臺集城東冢凡有數處
楊湖冢 在城東北二十餘里
亂冢 在城東北十數里几

數蔣家家在城東北二十餘里俗呼蔣家臺
朱邱寺冢 在城東北三十五里
武

家窪冢

在城東北三十里凡數處

青冢

在城西未詳

太康縣

夏太康陵

在縣東南二里夏太康遊寓崩葬

仲康陵

在大康陵東

周幽王陵

在縣東南三十里

平王陵

一名平丘在縣西金堆鄉

南頓侯陳子

禽墓

在縣北二十里明知縣程鉉修祠乾隆九年知縣宋士莊捐修墓廟

共城侯高子

羔墓

在縣西北三十里高賢集監生侯三畏捐地十畝以給守墓乾隆九年知縣宋士莊捐修墓廟

漢梁王彭越墓

縣東南三十里

舞陽侯樊噲墓

縣北三十里

高密侯

鄧禹墓

縣西北三十里

節侯馮異墓

在縣東北四十里

巨無霸墓

縣東

南二十五里

晉陶母墓

縣東南七里長沙公陶侃母

金梁墓

縣西北十五里

元三公墓

在縣西十里元南陽郡公韓椿贈梁國公韓克昌梁國公韓元善父子並葬此

墓

縣西南三里刑部尚書顧正中父子三人俱葬於此

明

戶部侍郎義士王彥才墓

在吳仁寺

尚書王鈍墓

縣東北十五里

高

朗侍郎王淪墓

在高朗

都御史顧佐墓

縣西南七里

侍郎韓

鐸墓

在江陵

苑馬郭在豐墓

在霸王臺

知府郭濟墓

在霸王臺前一

里

叅政郭緒墓

在霸王臺之陽

贈副都御史王杰墓

在高朗

政王朝賢墓

在高朗

何烈婦墓

在城東

國朝

京事王輔運墓

城西北

江陵

有二一在縣東十二里一在縣西十五里

陵

高陵

在縣西南四十五里

侯陵

在三侯祠

永陵

在縣西北六十里

青陵

在縣南五十里

寶陵

在縣西五十里寶建德塋

長陵

在縣西南三十五里

九女冢

在縣北二十里世傳姊妹貞烈如一陽邱在相繼而逝同葬於此今冢累如貫珠

西北四十五里

小邱

在縣西北十五里

老家

在縣南三十里

尖冢

在縣西北三十里

糴邱冢

在縣西南十五里

扶溝縣

諸袁墓

水經註云渦水逕大扶城之西城東北悉諸袁舊墓碑字傾低虎羊碎折有石獸頊刻隸

書銘云右天祿食敖倉飲山谷考太康志漢司徒袁滂御史大夫漁晉河南尹尚書侃皆扶樂人去此甚

近故其墓在焉今石歌存呂家潭齊家

唐謝處士墓

弘治中侯謝人得唐人銘元石紀齡芳儀永謝一奄泉扉魂返夕夜

宋尚書右丞丁度墓

在縣東

明刑部尚書劉自強墓

諭賜祭葬在萬家岡

太子太保劉澤深墓

論賜祭墓
在孟亭

角冢村

南三十里

雞悞冢

東南四十里

羅王家

楚人伐羅其王避楚兵於扶卒

墓此冢在坡水中隨水消長人神異之

袁三老碑

通志藝文碑目

載三老袁良碑或即諸袁墓碑今片礎不存矣

西華縣

周陳靈公墓

在縣西三里斧柯村

晉司空何曾墓

在縣東南隅墳前有二石羊詳見何家橡林

元學士徐世隆墓

縣南朱石村

明邑侯張本墓

西八十里張官橋

邑侯劉伯驂墓

東二里馬家溝

思恩

侯房寬墓

縣南長樂鄉

參政宋伯義墓

縣西長平鄉

參政尹醇

墓縣東北副使李澄墓縣清道判王璉墓縣南黃

僉都御史王敬民墓縣西南給事胡嘉棟墓城西參

政金勵墓縣西瀟奉政王省身墓縣東三王政王所

夢墓西南七御史張善政墓西南知州王宅世墓西

十同知王恒墓縣西七

皇姑冢在縣西七十里奪母城南詳不可考俗傳金

相王冢在縣西北鄉聶堆在縣北二十里邱堆去聶

里亦有廟焉聶堆者聶王之墓邱堆者邱王之墓詳

不可考與相王冢鼎足而三廟祀不廢豈嘗有功德

於一方白馬將軍冢在縣西十五里瀟洪村冢

商水縣

周固陵

赧王太子墓也在縣西南四十五里固現集之

即墓

東相傳赧王失國太子死節葬此後人高其議至固陵爲羽所破帝堅壁自守以待諸侯卽此

懷公墓

在縣西北西陵灣興福寺之畔

楚懷王墓

縣西二里許

秦太子扶蘇墓

縣西南三十里

將軍蒙恬墓

去扶蘇冢六十步墓門深遠涼氣逼

人人不敢入

漢好時侯耿弇墓

縣東十八里土人耕地拾玉帶玩一銅圖二一篆命臣字一篆耿弇之印

始知爲耿弇冢也

明張景昭墓

縣東南二里許詳孝義志

項城縣

漢華陀墓

在縣東六十里陀字元化沛國譙人也遊學徐土兼通數經曉養生之術年且百歲而猶

壯容沛相陳州舉孝廉太尉黃琬辟皆不就精於方藥治劑不過數種心識分銖不假稱量針灸不過數處若疾發結於內藥所不能及者乃先令以酒服麻沸散既醉無所覺因刮破腹背抽割積聚若在腸胃則斷截湔洗除去穢穢既而縫合傳以神膏四五日間皆平復曹操苦頭風屢召陀治後數辭以妻疾不至操怒殺之葬此

忠義冢

俗呼骨頭冢在縣西北七里舊傳漢光武遭王莽兵追匿何氏家何以子餘爲光武衣冠

代死光武夜得遁後莽軍覺返兵屠何氏家帝卽位收葬殘骨累土爲冢後人立光武祠於上祀之呼爲

何替龍冢又名爲老何營萬曆二十四年知縣王欽誥重修有碑刻存焉 **高邱寺** 縣東北

濱上有寺頗宏久頽順治十年 **胡家冢** 縣東二

三年土人哀孕茂募財重修 **荆棘冢** 縣東十五里上有真武廟 **大家** 縣東八里 **毛冢** 縣東八里 **神冢** 俗呼金鷄冢新建真武廟

縣西南 **百家** 縣北三十里遠近接連古冢約有百餘

沈邱縣

晉吏部郎畢卓墓

去縣西南三十里在鋼陽城

明劉孝子墓

在縣東十里路南生員劉天啟所廬墓

贈忠順大夫鄉賢盧

墓

縣西七里

布政使劉漢儒墓

縣城北三里

贈太僕寺少

卿忠烈公李孕嘉墓

縣西熊家冢

鄉賢孫守己墓

在城北鞠家集

西去城二十里有碑記

鄉賢普珣墓

在縣西八里阮家窪北

國朝武昌府同知王用晦墓

東北二十里

水邱

去縣南二十里考潁志漢光武

與王尋戰於此及卽位詔瘞戰死士骨今爲水邱寺墓猶存

添子冢

去縣五十里冢在小汝河交流雙溝水中水浮常沒頂水落出其半正德年有盜掘冢得

金玉簪金銀器有取之台室俱病相傳上古小國主陵墓土俗浪呼添子冢

沈邱

去縣東南三十

里廢沈子國城南疑卽沈子之邱又云沈諸梁邱
華陀之妹青冢去縣西二十五里黃河北岸不知何
死葬於此代何人家鄉人見其冢上草獨青於
他地遂相沿呼爲青冢焉

廟寺

淮寧縣

三皇廟

明萬曆丁未知州康應乾建

梓潼廟

在衛東小巷後萬曆丙午知州康應乾重

修今廢

晏公廟

在鼓樓西宋晏殊三知陳州民感德立祠於此後人改河神晏公謬矣

火

神廟

一在州治中關帝廟後一在梓潼廟一在南門城外一在南關

馬神廟

在南門內陳光

祀重

五顯靈官廟

在南甕城內今廢

立帝廟

一在北甕城上一在東甕城上

三元廟

在北甕城內

江東神廟

在南甕城門上

閻王廟

在北甕城內康熙二

十九年僧奉 **東嶽廟** 在城東關康熙二十三年州牧蕭公重建 **三義廟** 在天募修之

三元廟 內有弼城貞子閣明徽商龔相創建東置義田西置義冢兵憲徐即登於此立新安

社以課士會文州牧徐宗儒又新之壬午流賊焚毀康熙二十一年陳營守備錢必秀重修每年四月賽

會甚 **玉皇廟** 在順城 **元君廟** 在順城關內 **張真人廟** 盛 關西 即碧霞宮

在大北關 **三將軍廟** 在城東十里趙 **真武廟** 在城西三義左 雙兄弟破賊處 蔡河溝

即狄青梳洗臺墓也 一在城北沙窩 一 **洪山廟** 在城西北柳林 一在十二里土家店 柳湖

南澗 一在城 **黃仁廟** 在城東 **關聖廟** 一在糧城門指東南四十里 揮徐季彥建一

在東甕城內指揮賈廷詔建順治八年兵備孫公重修康熙二十四年州守蕭國弼復修一在火燒寨郡

人趙時 **蝗蟲廟** 在城東 **太子廟** 在城東北 **玄都觀** 在雍建 三十里 三十五里 柳

林集 **白衣大士閣** 一在北關東堤陶道士募建 **觀音** 內 在南關南十步許 棟檉建

堂在南關內 梁世銀建 洪福寺在城北門外一里許 雙堂廟在城

外復 法華寺在城內東南明洪武初百 月波寺在城內東

興集南隅四面皆 水寺居波心每夜月光倒影清澈可挹

凭欄一望塵想盡空近為放生池州守蕭公築之又

築魁星樓於對面其後有橋 銅佛寺在城內東北隅

名東門橋街民賀建糾修之 明成化初指揮

美漢施地 華臺在城北三里許 永興 于邱 壽聖

造像募修 明正統年建

沙岡 興教 慶會 藥聖 觀音 瓦關 朱

邱 上元 福嚴 蘆泉 慈恩 臺頭 大悟

諸仙 聖福 天王 天寧 黃德 樊聖 彌陀

朱里 慈善 崇寧 隆慶 明馬 平邱 夫

悲 石佛右三十二寺皆城外古刹

太康縣

帝舜廟

邑人作雲

聘早即禱禱即應鄉民爭迎焉聖人果兩即幽明之理不可測度膏澤則無窮

矣

漢壽亭侯廟

萬曆十九年主簿徐應坤修建

真武廟

建於永樂年間康熙七年

馬化龍

長白山土地廟

宋崇德二年建明末焚毀本朝甲子重建

洪山

真人廟

馬神廟

知縣胡三祝新建

火神廟

明弘治年建經兵火本朝知

縣田六

三義廟

縣治南街

泰山廟

宋崇寧二年建明洪武十年重修本朝知縣

張信

金龍四大王廟

明御史王堃建立

觀音閣

鎮江府通判魏觀颺建立

魯班廟

天寧寺內

天寧寺

元至正十年建本朝興屯同知劉愈奇重修

西王母

廟

李化文祝薦馨新建

呂純陽閣

順治十五年姚顯忠建

龍王廟

明洪熙三年程

瑛李養心修知縣張信重修

無底關帝廟

明成化生員張志建本朝生員鄭道長重修

三皇廟

知縣張信修

三官廟

與屯同知劉愈奇重修

帝馨廟

東北四十里

帝槐廟

東南十五里

光武廟

東五里

三侯廟

西三十里三侯周人唐文明葛

文鼎周文綱師破楚兵擒

敦義輕利事周厲王直諫不容奔吳帥上將不受賞復歸於周事宣王以功封

唐曰孕靈侯

葛曰孕感侯周曰孕昌侯宋徽宗封三侯俱真君墓在縣西三十里侯陵岡

鄧將軍

廟

西南三十里鄧本立廟

姬光廟

春秋吳太子光

東嶽廟

賈大定修

靈光塔

明萬曆二十五年都御史王垞建立

高十三級

圓通庵

順治十五年僧普元創建

扶溝縣

東嶽廟

一在大觀

一在東門內左方有嶽臺爲邑一在斗倉一在楊村岡

龍泉觀

元憲宗七

年建至正間地二十七畝

重修內有節次置後築高臺建神祠

玄帝廟

一在龍泉觀中一在東關

外一在裴村鎮村多建之

峇

關帝廟

在南門內各鎮村亦多建之

三官廟

在北關迤

東對城天井
同練寺
火星廟
在小十字街
龍王廟
在北關外雙泊

強陵岡芝亭
亦有廟
東郭外今北關外仍有龍王廟
玉皇廟

河上又建於
順治十年邑
侯吳朱頑邑孝廉羅芝徵重修
一在天井岡
一在路井營西
一
洪山廟
一在城西北隅廟後有五虎
小石洞
一在城東南隅

廟
在孟亭
崔府君廟
一在南良村
一在孫岳府君名
集北
一云名瑗字子玉唐樂平人

貞觀七年舉
賢良授長子令有惠政時有虎患食一
孝子乃以牒
攝虎至使服罪一縣以為神歷蓋陽衛

縣令數言便
宜開稻田數百頃民祀之稱為亞
玉皇
嶽累封靈惠
齊聖廣佑王故所在廟祀鄧志同

閣
一在練寺
集南
一在瓦子
在呂家潭
橋西
二郎廟
一在大湖岡
一在曹李村
二郎隋

趙昱斬蛟有
功熱民立廟灌口謂之灌口二郎
軒轅
又元封秦蜀
郡太守李冰之子二說未知孰是

廟
在西北十
光武廟
在西北廟頭
高宗廟
上村岡南
里軒莊

鄭莊公廟
在雕陵岡縣
固王廟
北二十里西張
季王

廟在集季岡張仙祠在城隍廟前今廢張仙本蜀王

狗保嬰遂皮塲公祠皮塲公本東京顯聖坊土地累

世祀之皮塲公祠封明靈昭應惠祐王又宋朝燕

詒錄行都試禮部皆禱於皮塲廟皮塲卽剝皮洧陽

侯祠魏郭嘉有功封洧陽亭侯馬太守廟在白沙園

扶風人漢章帝時爲陳留太守吳公廟在陳馬岡或云

守地屬陳留郡故立廟祀之吳公廟卽河南守治行

第一者按吳公上蔡人觀霸王廟在呂家潭東北閩

此則吳公墓有由來矣霸王廟有渡江幾溺者呼

王得免及歸秋胡廟在蔡河南岸

作廟祀之秋胡廟今廢羅夫人廟詳見辨疑

羲之獻之徽之廟在王墓詳天寧寺在儒學後宋崇

賀習儀於此天寧寺在瓦子店宋支亭寺西南十八

內設僧會司天寧寺景德元年建支亭寺里齊平十

年白馬寺在謝侯岡唐白雲寺東北三十里天慶寺

在三晉間金彌陀寺在孟亭集元時建興國寺東北五十里元大德二年

建湖莊寺在孟亭保周塢寺北五里明正統三年建江村寺東北六十里

崇興寺在韓村明景泰間重修崇勝寺在後歸村寺岡寺東南三十里慈

雲寺在義聲保明景泰六年重修觀音寺西二十里明成化年重修清涼寺在

寺今寺廢梵刹獨存靈邱寺東二十五里明景泰七年建觀音寺

南關外明正統十年建西興國禪院北曹李村膺福院在

侯謝報恩禪院在晉侯村黃堆院在三晉岡城隍廟在白亭城年久

不知創自何代觀音寺在白亭城創自五代明正德間重修文昌閣在

明嘉靖間重修觀音寺在白亭城創自五代明正德間重修文昌閣在

泉觀右康熙十九年關帝廟在董豕橋北年久不知

年知縣趙觀音閣在趙公祠南康熙三十八年建

西華縣

楊善寺

在縣治東南明洪武十五年僧會重修

大悲寺

在田家口集

禪虎寺

在縣北龍泉寺

在縣北思都岡

界臺寺

在縣北道陵岡南

提城寺

在縣西二

十里五代間建明洪武五年僧會因廢重建成化十九年僧澁浩重修嘉靖四年僧昌金重修萬曆千佛閣崇禎十年毀於

賊民修砦其上

觀音寺

在縣東北長平鄉明嘉靖二十三年監生李大受重修

修西觀音寺

在小窰鎮宋時建舊名法華禪院皇祐二年修剝浴室有碑記

新興寺

在縣南泥頭店

柳城寺

在縣南長樂村洪武六年建

地藏寺

在縣東茅岡村明景泰六年僧了

顯慶寺

在縣西南諸葛村明成化七年僧了深重修

壽聖寺

在縣西南

長社店宋僧崇昌建塔高十餘丈明天順間僧然有重修

清涼寺 在小窰鎮明永樂十年僧曉真

建西清涼寺

在縣西段莊村明嘉靖元年僧心之修

淨居寺

在西

王亭

寺

在縣西南張名卿明洪武十七年僧雲峯建

顯敬寺

在縣西奪母城明宣德二年建

佛寺

在縣西杜村明正統初僧會玉了英了忠重修成化十七年僧木貴本政重建

大覺寺

在縣西南

慧辨寺

在縣西七里倉宋紹興三年僧宗全建金承安五年僧洪會重修明

正德八年僧祖衣居民何山重修

蔡陽寺

在縣東北長平鄉明宣德五年僧悟存建

崇興

寺

一在谷水鋪一在清水驛

光武寺

縣南長樂鄉永樂六年知縣吳文郁建成化七年里民重

修相傳光武徵時常止宿於此故立廟

商水縣

關帝廟

城內南街路東舊草廟一所邑人祝姓者以罪發譴雲南不得歸夜哭見一人乘馬至謂

之曰汝何人在此哭曰我商水人因罪到此不得歸

是以哭耳乘馬者曰我亦商水人居南街姓壽汝欲

歸從我來遂挾之馬上令閉目但聞耳邊風聲須臾

謂曰汝當至矣隨置馬下莫知其向聞鷄聲候有行

路者問曰此何處答曰此黃家神也某人疑曰商水
 舊有黃家冲吾今其已至乎黎明果抵家矣家人驚
 且喜因泣下道其故隨入城覓姓壽者不得其所言
 居處止有關帝廟一問乃知爲壽亭侯之隱語也視
 其馬汗猶未乾其人遂感激約會改建大廟創堯
 三重後生員孫宏祚建過街忠義坊戲樓知縣王化
 行建春秋閣至今靈應如響康熙六年知縣王敬公
 詣選在都夢入一關帝廟扁書赤胆忠心四字帝君
 曰汝當選此地可爲我作此懸之遂寤是年果補商
 水及到任謁帝君廟宛如夢中所見遂手書四字懸
 於廟並述其事至今存焉一在東門外激水橋東一
 在周家口西偏沙河南岸山西商人張在天等建規
 模宏麗異於他廟一在城西北八里俗呼壽張家關
 帝廟一在城西扶蘇寺西俗呼老關帝廟一在城西
 南二十五里
 北蔡寺集 立帝廟 一在城內南街路西一在北門
 外一在周家口河南老街路西
 一在北蔡 炎帝廟 一在城內西城下一在北街路東
 寺之東首 一在華家河橋南路西一在北蔡
 寺之東首 一在 二郎廟 在東郭
 龍塘河之東首 二官廟 在北關
 玉皇

廟在東關北三皇廟在玉皇廟之右東嶽廟在城南二里許靈濟廟

神醫華陀祠在北關外明宣德年建漢高祖廟在城西四十里今圯黃

帝廟在城西三十里今圯漢光武廟城西唐鎮廟即漢高祖祠

在城西南王靈官廟真武護法在城西二里火燒橋之左失馬廟在城

東十里漢光武失馬處烏溝廟在城東七里邱生廟在城西南二十里北蔡寺之

西相傳邱生與蕭何造律廟之下即其冢也然前史不載無可考証按前漢書蔡人曹邱生說士也與季

布同時疑即其人也永福寺在城內東街宋建中二年建明僧繼宗重修僧會司居焉凡遇慶賀

官吏師生於此習儀觀音寺在城南抬頭寺在城東十八里焦岩寺在城南

五十里五樓寺在城東南鐵佛寺在城東南南陵寺在城

西二十里東陵寺在城北天王寺在城南王田寺在城南

五里

二十里北蔡寺在城西南二十五里留禪寺在城西二十里扶蘇寺在城西三

里龍門寺在東北十二里遠通寺在城東北六里亭營寺在城西三十里史

莊寺在城西北四十里清涼寺在城西北十五里栢陵寺在連家集西首霧

臺寺在城南十五里地藏寺在周家口老街南首之左白衣閣在城內西南隅女

貞觀在城內東南隅觀音堂在城內東南交昌閣下王家堂在城西七里頭柴

家堂在城東北十二里李家堂在城東北十五里胥家堂在城南七里寶

豐閣在城北八里宋家火屋閣在城北十二里玉皇閣黃家沖在

城南十懷邱寺在城西北鍾鐘倉在城西南三十五里龍潭寺在城西南

五十里裴家寺離城三十里裴家廟在城西南十五里

項城縣

大吉寺

明洪武初年建置僧會司宣德三年避水患遷今治寺亦隨改於縣治東南隅成化二十

一年重修凡遇慶賀官吏師生習儀於此朔望講約亦集於此年久漸圯本朝康熙五年邑生員闔鎔

里民袁印茂唐文華方華德等重修準提閣在縣治

二十五年知縣顧芳宗重修今頽圯

吉寺後虹河北岸順治十八年知縣黃陞捐俸鑄準提銅像

培基築臺康熙三年知縣蕭銘鼎捐俸鑄準提銅像建閣一所四面水環成巨觀焉知宛在亭在準提閣

縣錢國寶建觀音殿三間於閣前

流順治十七年知鹿苑寺在南頓街梁武朱灘寺在

縣黃陞創建今圯

北二十百家寺縣北三里苑亭寺縣北二官倉寺縣東

五里樓堤寺城北十里廣陽寺城西北白塔寺城北六丁

村寺城東北岳聖寺城東六神冢寺城西興隆寺城

北二十真武廟一在縣東北東嶽廟在城西嶽廟在

五里

西
火星廟

一在縣治南
在縣北關外

蕭公廟

在南
鎮

晏公廟

城西
七里

玉皇祠

一在縣治南
義官張慶建
一在城內
鄉民建

廣嗣祠

在東嶽
廟左
康

熙二十六年
舉人閻濬重修
乾隆九年
監生閻壇倡修

碧霞行祠

在廣嗣祠東
乾隆九年
監

生閻壇
倡修

三官祠

在縣治
東北

沈邱縣

宛邱寺

在城內
東北隅

增壽寺

在西關
北首

香臺寺

在城南
小河南

觀音

寺

在毛家營
黃河北岸

勝福寺

在鞠家
集北

大悲寺

在八
里灣

草堂寺

集東嶽廟

在南關北
首大街

眞武廟

在北
門外

玉皇廟

在南關
東頭

火

星廟

在南關
東首

關帝廟

在西關
外北首

洪山廟

城西五里
熊家冢北

太微

觀

在毛家
營南

玄帝觀

在鞠家
集北

佑聖觀

在槐坊
店中街

龍王廟

城南

三里小重修增壽寺舊志寺乃明鄉賢方伯公之香

河南岸大院所止地十餘畝日久傾圮

康熙五十年其四世姪孫內閣中書劉璠請於總憲

揆公捐銀六千六百兩於寺東買民宅地基重修并

置香火田三頃八十七畝一名茶庵在街東

藏庵亦劉氏香火院也

在牛坡店集南係前任范令買地建立并施香

火田十畝雍正年間范貧來索價僧人寂賢將

原價付還范出賣

約地爲僧售矣

陳州府志卷之十終

陳州府志卷之十一

楚鄂崔應階吉升氏纂修

風俗

自古聖帝明王所都必有上古之遺風焉况陳爲太
昊所居尤稱最古者哉故從來民性淳厚風俗質朴
男耕女織不務遊戲無益之事然地廣濶耕種鹵莽
所謂糞田疇美土疆者無有也隨入爲出不務蓄積
性剛任氣耻下人蓋亦習俗然也去其桀驁使盡醇
龐是在司牧者之有以化導焉志風俗

夫風俗淆於地而漸於化者也地善故民淳化隆則俗

美陳垆中土物受正氣在古三皇迭馭以道化民無
爲而治其風邈乎不可稽矣卽五帝及夏商道一風
同之化於陳亦無可考逮周武王建陳以元女大姬
配胡公大姬尊貴好樂巫覡歌舞之事民俗化之降
而春秋迫於強楚爲其凌駕陳俗不免似之爾後公
卿宣滫民無則效多游佚淫蕩之行載於國風者可
考也漢尚寬簡汲黯爲守又以清靜爲治史稱其俗
習淳尚質好農重民亦可想已歷唐宋及明賢守不
一相與振勵而化導之風淳俗美他邦鮮儻我

朝仁育義正濡洽尤深故其俗高節義尚廉耻勤耕織急

公賦屏奢華慎威儀重喪葬

郡人多結賻會以備喪葬之事賻奠弔送多近

古謹婚姻

婚者唯論男女門第不論聘財多寡

亦庶乎太古三代之風

矣然性情褊急少優容一言不合卽相與忿爭不已

歲入有數斛饒輒羣聚飲酒餘一餘三非其所計也

冠禮久廢不載婚禮先議允男家至女家謝女家回

謝名門通啟鄉民定聘

如財物簪珥之類

請席會親亦男先

女後親迎男家專請女家擇期至期請大賓媒紅禮

用糖羶羊酒或四或八或十二衣服被褥如之金珠

首飾其類不一惟聘金返璧女家陪粧亦畧相稱女

至夫家父母送飯三日至九日多請親戚完飯親戚

亦各送飯三日新婦廟見拜姑舅無廟拜墓婚四日拜門姑率新婦拜見伯叔父母親戚尊長

喪禮大小殮之屬久不行餘自始死至葬與家禮不共相違三年之喪從厚者多期功而下未免脫畧

祭禮有廟者少無廟者多堂上供祖先逢時節朔望具歡饌供果品男女以次拜跪三月七月拜掃十月送寒衣則祭於墓

歲時瑣事

每歲元旦雞鳴盥櫛陳牲醴祭天次祭祖先男女奉

祀事設庭燎

燒榆柳木根謂之庭燎

紙炮聲光徹旦三日不開

市七日祭賽火神以神之誕辰也上元前後之夕架
燈植火樹簫鼓謳歌達旦或作燈謎謂之打虎十六
日闔郡士民辦香詣太昊陵奠獻觀者因而爲市亦

有過橋者謂之走百病有以麵捏燈十二盞各捏其

邊如十二月數蒸熟取出看某燈內氣水以驗某月

有水或蒸麵繭以祀蠶姑又於正月上旬占日干坐

子知歲豐歉

甲子年豐丙子年旱戊子
年蝗庚子年荒壬子年饑

二月十五日

花朝士多宴賞如李白桃李園遊賞故事三月三日

戴蠶菜花俗云可免目疾鋪之衽席下謂可辟蚤清

明日墓祭加土於隴謂之上墳折柳枝戴之或挿於

門額携酒肴郊遊謂之踏青十五日洪山廟會遠近

皆來祭以神司六畜之命也二十八日城隍廟會士

民香楮奠獻各色貨玩雲集道傍交易一日

近來本廟建醮

春三月香火不絕

穀雨置符帊于楹門壁間以禁蝎四月

八日僧舍爲浴佛會鄉人帶皂莢葉然不知何所取

也五月五日謂之端午爲角黍飲菖蒲雄黃酒貼艾

虎戴艾並插於門小兒帶五色絲索謂之百索且以

雄塗兒及手足曰辟虫毒有取蝦蟆置墨口中者陰

乾磨塗癩腫毒醫家亦以午時合藥取其用之效也

婚姻之家以是日追節十三日關聖廟會祭寶蓋禮

天多雨俗謂之磨刀二十五日俗以爲分龍節雨則
多大水六月六日黎明汲水造酒醬麩豆豉以瓮蓄
之取其經月不壞曝書衣及裘褐則虫不蛀以麥麵
炒拌鹽糖食之曰除腹痛及痢七月七日夕乞巧十
五日掃墓祀祖先八月中秋日設月餅瓜果酒肴香
楮候月升祭暢飲九月九日蒸麵糕相餽送登高飲
酒婚姻家亦以是日追節十月朔日墓祭剪紙爲冥
衣焚之謂送寒衣是月也農工已畢田家置農器於
場備牲醴香楮祭之祭畢相餉勞及佃人俗曰卧破
宰牲命樂賽土穀之神懽飲一日謂之牛王社冬至

西州府志 卷之十一
縉紳相拜賀畧如元旦儀俗煮赤小豆食之以湯灑地曰辟瘟十二月八日食臘粥葫蘆收雪入甕置陰處暑月煮肉食驅蠅汲臘水造酒經年不壞二十三
日備紙馬祀竈神品用飴糖或有在二十四日者掃舍宇二十八九日多設餅糲雖貧亦具焉除日多嫁娶書春帖易門神列桃符撒芝麻杆於屋院地守歲
焚辟瘟丹

物產附

語有之原大則饒原小則鮮陳多水潦而寡山林材木不足以備器用絲枲不足以給服御甚則鮮藁茗

醯之供率取諸市豈力積之智固不及此哉抑義本務樸其俗然也

著草

著一千歲而三百莖其本已老故知吉凶著未大於本上吉次蒿次荆皆如是龜著皆月望浴

之孔弓

于箭舊出今二家絕失傳

穀類

麩麥 米大麥 王大麥 黃小麥 紫實麥 蕎

麥 春麥

向無此種乾隆七年知府崔應階購自直隸以備窪地雨潦春耕補種之需近始傳

播各邑漸有佈種者粟穀種類甚多黍有白紅稷五穀稌俗不

尚間有稻惟宜水亦有陸稻窪梁有白紅菽豆之總

種之者下之地開或種之黑紫青數種又有豌豆紅白小芝蔴有紅白黑三種豆紅白豇豆菹豆扒山豆黑者名巨勝可

療疾

蔬類

白菜

芥菜

蔓菁

白蘿蔔

紅蘿蔔

胡蘿蔔

眉豆

絲瓜

刀豆

南瓜

冬瓜

瓠

茄

葫蘆

王瓜

生菜

菜瓜

萵苣

菠菜

蒲

山藥

莧菜

茼蒿

芹

葱

韭

蒜

地王瓜

雞

香菊

荊芥

薄荷

寒豆

十弟兄

黃芽

白花

芫荽

嚴穗

蘑菇

泉類

木棉

縠麻

布

絲

縑

綾

果類

石榴

胡桃

杏

桃

李

梅

棗

柿

栗

花紅

沙果

蘋婆

羊棗

葡萄

櫻桃

銀杏

蓮房

西瓜

藕

甜瓜

梨

西華菓夏亭有哀家梨甘脆無比每獲地卽粉碎經宿其質不縮按書有皮家梨後人惡哀姓易

以袁則袁家梨卽哀家梨

木類

榆 柳 楊 栢 檜

松 楮 桑 椿 桐

楸 竹 梧 皂角 冬青

棟

花類

牡丹 有黃紅紫白數種 芍藥 薔薇 紅梅

白梅 臘梅 有冰素磬口虎蹄數種 玉簪 月季

木槿 有紅白二種 玫瑰 海棠 有鉄脚垂綵西府梨花數種

石竹 木香 有千層單瓣二種 梔子 桂 有丹黃二

種

瑞香

夾竹桃

有千層單瓣二種
閩人謂之生花竹

荷花

有深紅淡紅
白色三種

荼蘼

秋海棠

海石榴

絳桃

玉蘭

菊

葵

鳳仙俗名

小桃紅
指甲草

萱草

剪髮

茉莉

紫薇

迎春

金錢

蜀葵

滿池嬌

玉堂春

百日紅

雞冠

罌粟

翠蛾眉

金盞

杜鵑

丁香

山丹

西番蓮

旱蓮

天竺

草類

蓼

藻

蕓

萍

葦

茅

蒿

莎

蓬

稗

莠

蒺藜

馬蘭

紅花

可以染

蓄草

星星

菱

淮

了楷

靛

有三種

藍染緣大藍染碧槐藍染青

蒲

葛

艾

藥材類

枸杞

杏仁

桃仁

地骨皮

紅花

荆芥

薄荷

門冬

南星

茵陳

牽牛

蒲黃

車前

蒼艾

芫花

金銀花

桑白皮

急性子

蛇床子

大楓子

益母草

瓜蒌

稀莨草

皂莢

稻

側栢葉 麥冬 商陸 括蕒根 牛蒡子

來服子 草蓆子 地膚子 楮實子 桑葉

薏苡仁 何首烏 百合 地可 花粉

兔絲子 夜明沙 香附

羽虫類

燕一名元 鳩一名雀 畫眉 黃雀

竹雞 鴝鴖 鴛鴦 鴿 鷹

黃鶯一名倉庚一名鸚鵡一名黃鳥又稱金衣公子 杜鵑即子規又名杜宇

鴟即伯勞 鴝 鴉 鳴 鳧

鸛 鶯 鶻 鵲 鷺

鵝

雞

啄木鳥

鵝

鵝

鴉

毛虫類

牛

馬

騾

驢

豬

犬

羊

貓

兔

獾

鼠

狐

狸

鹿

狼

野豕

鱗虫類

鯉

鯽

鯽

鮎

魴

鱧

鱣

鰻

鰻

魴

鱧

甲虫類

鯨

蚌

螺

蟹

羸虫類

蠶

蜂

蟬

螢

蚊

蠅

虻

螞

蛾

蟋蟀

蜻蜓

蝶

螳螂

蚰蜒

蝎

蜘蛛

螽斯

蝸牛

刺蝟

蝎虎

蝙蝠

蛇

蟻

蛙

農桑事宜

正月嫁樹曬蠶連栽樹栽白蠟條薺韭耕穀田 二
月葺蠶室種瓜瓠種山藥接果木樹栽蘿蔔芥種子
種水蘿蔔 三月種綿花種菊秫栽芋頭種麻子育
蠶種藍種茄種粟種稻栽藕 四月種黍收繭繰絲
絮績收蠶種抽蒜薑薦櫻桃收菜子放白蠟蟲種芝
蔴條桑 五月刈麥踰麴收紅花收諸菜子收蒜種
各色豆移竹 六月種蕎麥造大麥酒種芹芥芸薑
諸菜栽韭 七月砍麻漚麻刈早粟黍稷菊秫收白
蠟種韭種葱胡荽 八月築場圃刈芝蔴摘綿花種
麥種紅花種苜蓿剝棗 九月刈稻刈蕎麥收穀種

採菊造酒出芋挖山藥挖藕醃冬菜 十月收槐角

子窖芋頭葺屋績紡 十一月刈蒲葺伐本埋穀種

造錫糖浴蠶連 十二月修耒耜畜羊羔造酒醱造

糟醃肉

以上農桑時事大都與他處畧同矣侯喋喋第其樹藝有時土人未必諳也特附錄為此

中物產之一助云

十二月勸農歌

崔應階

舊志農桑事宜與予所製授時分收圖大畧相類因附錄勸農歌於後以備農事之一助云

正月風和始立春農家事事又從新犁鋤用處先修

整糞壤閒時早拌勻插柳栽榆湏著力伏雞養豕要

留心一年生計憑勤儉莫要偷安學懶人

二月農家事漸忙男耕女織趁時光
棉紗紡就增利野萊挑來可適腸
放出牛羊須照管修成塘堰要
隄防栽桑接果添生意賣得錢來好辦糧

三月春深穀雨來高糧穀子一齊栽
養蠶要摘柔桑喂浸稻才將雪水開
急整秧田添糞沃細鋤麥地去
蒿萊夜歸早出休教懶勤儉人家自發財

四月天長立夏時農忙無事不支持
晴來大麥收宜早雨過新秧插莫遲
蠶繭做成纔出箔棉花鋤罷已
開枝休因閒氣爭長短陪著工夫告狀詞

五月風吹二麥黃紅花菀豆盡登場
割時多覓人工

快收起須防雨水傷纔把早禾鋤得淨又將晚菽種
成行辛勤誰似農家苦一歲銀錢出在忙

六月時當大雨行河堤塘堰要防傾種完五穀鋤三
遍秀出雙歧滿十成閒地耩些蕎麥種空池漚把苧
麻莖日長切莫偷閑睡去放牛羣趁草生

七月西風應立秋家家場院急宜修割來穀子須留
穗斫倒高糧要搯頭豆蔓細將車去載芝麻輕用簸
羅收豐年五穀休拋撒一歲餘來兩歲留

八月秋深風漸涼只餘晚稼未登塲因栽冬菜將園
灌爲檢棉花紡線忙犁轉田疇多熟耙賣些穀豆早

完糧村村又報平安社醉飽家園樂滿堂

九月霜來草木凋種完麥子又收蕎修成地窖堪藏
菜整頓鎌鉤好割茅牛馬圈羊肥草墊兒童路上糞
筐挑千倉萬囤年豐熟積貯須防水旱焦

十月天寒又立冬告登萬寶罷三農溝堤趁此當修
築墻屋從今可動工短日且來勤夜作閒時莫去賭
場中同鄉共里相和美無是無非樂歲豐

冬月霏霏瑞雪飄閒來山澤可漁樵棉衣製備應忘
冷糧食收藏省浪消野獸河魚尋出賣草根木葉掃
來燒又須防火兼防盜守夜輪更莫憚勞

臘月韶華漸欲更終年勤苦是吾民涓良子弟官憐
愛孝友人家世獎旌萬事但能存忍耐一生自可保
清平全家歡樂多行善天賜嘉祥百福迎

陳州府志卷之十一終